



**Nuuk Ilulissallu ukkataralugit inuiaqatigiit
aningaasaqarnerinut sunniutissanik
naliliinerup nutarternera**

Marts 2022

Imarisaa

1	Aallaqqaasiut tunuliaqutaalu	3
2	Eqikkaaneq, inerniliinerlu	8
3	Danskit KAIR Internationalimut akuunissaat pillugu isumaqatigiissutip kingunera	10
4	Tunngavigisat	14
5	Tunngaviit allanngornerinik inuiaqatigiit aningaasaqarnerinut sunniutissanik misissueqqissaarneq	24
6	Naatsorsuutigisamit allatut pisoqassagaluarpat kingunissai	27
7	Missingersuutini aningaasaqarnerup misissoqqissaarnera	31

1 Aallaqqaasiut tunuliaqutaalu

KAIR Internationalip akisussaaffigisaanik Nuummi Ilulissanilu imarpik qulaallugu timmisartuussinernut mittarfiliat ukkatarlugit, misissueqqissaarnermi matumani inuiaqatigiit aningaasaqarnerinut sunniutissat nalilersorneqarput.


Mittarfiliassat pillugit suliniut 2018-imi inaarutaasumik akuersissutigineqarpoq. Mittarfiiit tulliuttut mittarfiliassat pillugit suliniummi pineqarput:

- Nuuk 2.200 meterinik takitigisumik mittarfilerlugu
- Ilulissat 2.200 meterinik takitigisumik mittarfilerlugu
- Qaqortoq 1.500 meterinik takitigisumik mittarfilerlugu

Naalackersuisut 2,1 mia. koruunit missaannik aningaasaleeqataassutsinik akiliuteqarnerisigut mittarfinnik taakkunannga pingasunik piginnittussanngorlugu, pilersitsisussanngorlugu, aningaasalersuisussanngorlugu, ingerlatsisussanngorlugulu KAIR pilersinneqarpoq.


Inuiaqatigiit aningaasaqarnerinut sunniutissanik naliliineq kiisalu Kalaallit Airports A/S-imik (KAIR) ingerlatsinissamik, aningaasalersuinissamillu pilersaarut ilaatigut tunuliaqutaralugu, mittarfiliassat pillugit suliniut 2018-imeersoq ilaatigut akuersissutigineqarpoq. Danmarkimi naalackersuisut isumaqatigiissusior**figitinnagit**, KAIR-imut piginnittuunermut aningaasalersuinissamullu iluseq ima takussusiorneqarsinnaavoq:

Takussutissiaq 1: Danmarkimi naalackersuisut isumaqatigiissusior**figitinnagit** piginnittuunermut, aningaasalersuinissamullu iluseq



Piginneqatigiit KAIR Internationalip akisussaaffigisaani Nuummi Ilulissanilu mittarfinnut aningaasalersueqataanissaq piginneqataanissarlu pillugit, 2018-p ukiaani Naalackersuisut taamanikkut Danmarkimi naalackersuisuusunut isumaqatigiissusiorput. Inuiaqatigiit aningaasaqarnerinut sunniutissanik naliliineruput kiisalu KAIR-ip ingerlatsinissamik aningaasalersuinissamillu pilersaarutaanut tunngavissiillutik ilimagisarpaaluit isumaqatigiissut taanna ilutigalugu allanngortinneqarput. Danmarkip KAIR-imut akuunissaa pillugu ilassutitut allakkiami allannguutit taakkua ilaatigut allaaserineqarput. Danmarkimi naalackersuisut isumaqatigiissusior**figereerlugit**, piginnittuunermut aningaasalersuinissamullu iluseq ima takussusiorneqarsinnaavoq:

Takussutissiaq 2: Danmarkimi naalackersuisut isumaqatigiissusior**figereerlugit** piginnittuunermut, aningaasalersuinissamullu iluseq




Namminersorlutik Oqartussat KAIR-imut aningaasaliissutissaannit 2,1 mia. koruunit missaanniittunit 1,4 mia. koruunit missaat KAIR Internationalimut aningaasaliissutigineqarsimassasut naatsorsuutigineqarpoq, imaappoq Nuummi Ilulissanilu Imarpik qulaallugu timmisartuussinernut mittarfissanut. Tamatuma saniatigut takussutissiaq 2-mi takuneqarsinnaavoq, 700 mio. koruunit avataanit aningaasaliissutaaqqaartut, naalagaaffiup aningaasaliineratigut nammineq aningaasaliissutinngorlugit allannngortinneqartut.

Imarpik qulaallugu mittarfissanut taakkununga marluusunut tamakkiisumik aningaasartuutissatut missiliuutit 900 mio. koruunit missaannik 2021-mi qaffanneqarput. Sanaartornissami aningaasartuutit 750 mio. koruunit missaannik qaffariarnerat kiisalu ingerlatsinermi aningaasalersuinermilu aningaasartuutit 150 mio. koruunit missaannik qaffariarnerat qaffariassutigaa. Aningaasartuutitut qaffaatit taarsigassarsinikkut aningaasalersorneqassapput. Taakkunanga 600 mio. koruunit danskite Naalagaaffianit taarsigasseqqinnikkut, sinneruttullu 300 mio. koruunit niuerfimmil taarsigassarsinikkut aningaasalersorneqassallutik. Tamanna nalunaarusiap matumap kapitali 3-ani ersarinnerusumik nassuiaatigissavarput.

taamaalilluni KAIR Internationalimut tunngatillugu pissutsit nutaat ima takussusiorneqarsinnaapput:

Takussutissiaq 3: Danmarkimi Naalakkarsuisut isumaqatigiissusiorfigereerlugit, 900 mio. koruuninilu taarsigassarseqqereernerup kingorna KAIR Internationalimut piginnittuunermut, aningaasalersuinissamullu iluseq



Takussutissiaq 3-mi tabelimi takuneqarsinnaasutut, avataanit aningaasalersuutissatut tamakkiisumik pisariaqartinneqartut maanna 1.800 mio. koruuniupput, taarsigassarsianiillu 1.050 mio. koruunit danskit naalagaaffianit taarsigasseeqqinnerullutik¹, sinnerilu niuerfimmit taarsigassarsinikkut aningaasalersorneqassallutik.

Mittarfiliassat pillugit suliniutip akuersissutigineqarneranit pissutsit allanngortinneqartut eqikkarlugit imaapput:

- Mittarfinni taakkunani pingasuusuni aqqissuuseriaaaseq, piginnittuuneq aningaasalersuerialaasut 2018-imut sanilliukkaanni ullumikkut allaapput.
- Kangerlussuaq Imarpik qulaallugu timmisartuussinernut mittarfiunera ingerlaannarluni kiisalu Nuummi Ilulissanilu Imarpik qulaallugu timmisartuussinernut mittarfissat nutaat pilersinneqaratik 2018-imi misissueqqissaarnermi tunngaviusumik periarfissaasoq, Mittarfiliassat pillugit suliniutip akuersissutigineratigut atuukkunnaarpoq.
- Immikkoortorpaalunni ilimagisat nutarterneqarput, matumani suliariumannittussarsiuussinerni inernerit kiisalu sanaartornissami aningaasartuutit, aningaasalersuinissami aningaasartuutit, isertitassanullu aningaasartuutissat ersarinnerusumik missiliuutaasut ilanngullugit atorneqarsinnaapput.

Ataatsimut isigalugu pissutsit taakkua kingunerisaannik 2018-imi misissueqqissaarnerit, misissueqqissaarnerlu una ataatsimoortinneqarsinnaanngillat, ima paasillugu, misissueqqissaarnerit toqqaannartumik nallersuunneqarsinnaanngillat. Mittarfiliassat pillugit suliniutip akuersissutigineqarnerani mittarfinnut pingasuusunut suliniummut Namminersorlutik Oqartussat piginnittuunera, ullumikkullu Qaqortumut tunngatillugu suliniut Namminersorlutik Oqartussanit kisimi pigineqarlunilu aningaasalersorneqartoq, Nuummut Ilulissanullu suliniummut tunngatillugu Danmark KAIR Internationalimut pigineqatigalugu suliniutip ingerlanneqarnera, taarsigassarsiallu aningaasalersorneqarnerisa allanngortinneqarnerat pingaarnertut patsisaavoq.

Misissueqqissaarnermi immikkoortut tulliuuttut misissueqqissaarnermi tunngaviupput:

- Inuiaqatigiit aningaasaqarnerinut sunniutaasussanik nalilersuineq, Alloriarneq 2, april 2018

¹ KAIR-ip siullermeertumik 450 mio. koruuninik taarsigassarseeqqinnerata kingorna, taarsigasseeqqinnermi nutaami tamakkiisumik erniaa annertuumik qaffannikuuvoq. Siullermik taamanernut saniullugu erniaq ullumikkut qaffasinneruvoq, aappaattullu arlaatigut ajutuussagaluarpat KAIR sinnerlugu danskit naalagaaffiaata aarlerinaammut akisussaaffimmik tigusunerminut 1,3 procentimik ilanikuullugu.

- Danmarkip akuunissaa pillugu ilassutitut allakkiaq, 2018-ip ukiaani
- Qaortumi nutaamik mittarfeqalernerani inuiaqatigiit aningaasaqarnerannut sunniutaasussanik nalilersuineq, juni 2021
- KAIR Internationalip ingerlatsinissami aningaasalersuinissami pilersaarutaa 2021-mi nutarterneqartoq
-

Imaappoq, akimortumik suleqatigiissitap ukiorpaaluit ingerlanerini suliaat aallaavigalugit misissueqqissaarnerpaaluit isumaliutissiissuterpaaluillu, matumani ilimagisat akimortumik misileraanerit misissueqqissaarnermi matumani aallaavigneqarput.

Misissueqqissaarnermi inernerit eqikkarneqarnerat nalunaarusiami aallarniutigineqarput. Taassuma kingorna Danmarkip KAIR Internationalimut akuunerata kinguneri allaatigineqarput, malitsigisaanillu misissueqqissaarnermi tunngaviullutik naatsorsuutigineqartut nassuiarneqarlutik. Inuiaqatigiit aningaasaqarnerinut sunniutissanik 2018-imi naliliineri periarfissaq 1 aallaavissatut 2018-imi aalajangiunneqarnera aallaavigalugu, inuiaqatigiit aningaasaqarnerat isigalugu immikkoortuni tamani inernerit taassuma kingorna saqqummiunneqarput. Inuiaqatigiit aningaasaqarnerinut sunniutissanik naliliineq, nunatta karsianut sunniutissat ukkataralugit missingersuutini aningaasaqarnerup misissoqqissaarneranik malitseqarpoq.

1.1.1 Misissueqqissaarnermut oqaaseqaatit

Mittarfimmut aningaasaliisoqartillugu, aningaasaliissuteqarnermi peqqissiminissamut periarfissaqarpallaanngilaq (allanngortinneqarsinnaanngilaq). Mittarfimmut aningaasalersuiniarluni nunap karsianit aningaasaliisoqarneratigut, inuiaqatigiit iluanaarutissaat qanoq annertutigissanersut qulakkeerneqarsinnaanani, iluanaaruteqassagaannilu annertuumik sulisoqaqqaartussaalluni, iluanaarutissat ukiorpassuit ingerlanerini aatsaat sunniuteqartussaallutik aningaasaatinit tigorianaannit annertuumik akiliinerusarpoq.

Aningaasat mittarfinnut atorneqartut immikkoortunut allanut assersuutigalugu ilinniarnermut assigisaanulluunniit atorneqarunik, inuiaqatigiit aningaasaqarnerinut iluanaarutissat qanoq issanersut misissueqqissaarnermi eqqarsaatigineqanngilaq. Tamanna misissueqqissaarnermi ilaatinneqarsimannginnera, Kalaallit Nunaanni Aningaasaqarnermut Siunnersuisoqatigiit sionratigut isornartorsiornikuuat. Tamanna misissueqqissaarnermi aamma ilaatinneqanngilaq, tamatumani attaveqatigiinnermut aningaasaliinissaq immikkoortunut allanut aningaasaliinissamut nallersuullugu tunngaviumik isumaliutiginagu, 2018-imi misissueqqissaarnerit nutarterneqarnissaasa suliaasaanera patsisaalluni.

2018-imi misissueqqissaarnermut atavillugu ilisimagineqarpoq, Mittarfeqarfiit (MIT) ingerlatsinera sunniuteqarluarnerulissasoq. Ukiumut 8-10 mio. koruuninik sunniuteqarluarnerulissasoq 2018-imi misissueqqissaarnermi naatsorsuutigineqarpoq. Misissueqqissaarnermi matumani MIT-ip sunniuteqarlualernissaa ilanngullugu naatsorsuusiorfigineqanngilaq. Matumani MIT-ip suliffeqarfittut namminersortitaanerata aktianik piginneqatigiiffingortinneqarnissaanik, MIT-illu KAIR Holdingimut ilanngunneqarnissaanik pilersaarutigineqarnera patsisaavoq. Imaappoq, pitsanngorsarneqarsinnaanera, pisariaqartitalu siulittuutigiuminaassinnaasut.

Ilulissani, Nuummi Kangerlussuarmilu mittarfiit sinneqartoorutaajunnaarlutik MIT-ip suliaasaaniittussaajunnaartussaanerisa kingunerisaanik, MIT-imut tapiissuteqarnissamut pisariaqartitsineq misissueqqissaarnermi naatsorsuusioparput. Kangerlussuarmut, Ilulissanit Nuummiillu 2019-imi sinneqartoorutaasut naatsorsorneqarnerisigut, tapiissutissat annertussusissat missiliorpagut.

Mittarfiit isaatitsissutigineqartartut, mittarfillu amigartooruteqarfiusartut akornanni MIT-ip iluani tapiissutinik ullumikkut nussuisoqartarmat oqaatigineqassaaq. Imarpik qulaallugu timmisartuussinernut mittarfiit siunissami KAIR Internationalip akisussaaffigisaanik ingerlanneqartussaammata, tapiissutinik nussuisarneq Naalakkersuisut MIT-illu akornanni

kiffartuussinissamik isumaqatigiissutinik taarserneqassaaq. MIT-ip akisussaaffigisaani mittarfinni piusuni pingasuusuni Nuummi, Ilulissani Kangerlussuarmi ingerlatsinermi ataatsimoortumik sinneqartoorutit, KAIR Internationalip akisussaaffigisaanik imarpik qulaallugu timmisartuussinernut mittarfissat ammarneqarnerini sinneqartoorutaajunnaartussat naatsorsuutigineqartunut, taamaalillunilu MIT-ip akisussaaffigisaanni mittarfinnut amigartoorutaasunut matussutissat atorneqarsinnaajunnaartussanut, misissueqqissaarnermi tapiissutissat pisariaqartinneqartut naapertuupput. Taamaattumik inuiaqatigiit aningaasaqarnerinut sunniutissanik naliliinermi matumani tapiissutissat pisariaqartinneqartut naatsorsorneqartut, imarpik qulaallugu timmisartuussinernut mittarfissat nutaat atulerneqarpata, MIT-imut kiffartuussinissamik isumaqatigiissutinut naleqqiunneqannginnissat erseqqissassallugu pingaaruteqarpoq. Imapik qulaallugu timmisartuussinernut mittarfissat nutaat atulerpata kiffartuussinissami isumaqatigiissut qanoq annertutigisumik aningaasartaqarnissaani, MIT-ip nunaqarfinni qanoq annertutigisumik ingerlatsinissaa ilanngullugu Kangerlussuaq qanoq naleqqussarneqarluni ingerlanneqarnissaa apequtaassamat, eqqumaffigissallugu aamma pingaaruteqarpoq. Kiffartuussinissamik isumaqatigiissut missingersuutini aningaasaqarnermi negativiutitsissasoq avaqunneqarsinnaanngilaq. Tamanna arlalitsigut iliuuseqarfigineqarsinnaavoq.

Nuummi mittarfissaq ukiumik ataatsimik kinguaattoornikuuvoq. Kinguaattooruteqarneq taanna inuiaqatigiit aningaasaqarnerinut sunniutissanik nalilersuinermit annertuumik sunniuteqanngilaq, ukiut 30-t siunnerfigalugit naammassineqartussaamat. Taamaakkaluartoq Nuummi mittarfissaq 2023-mi naammassineqarnissaa tunngavigalugu, aningaasaliisimallutik assersuutigalugu unnuisarfinnut kinguaattoorneq unammillernarsinnaassamat eqqumaffigissallugu pingaaruteqarpoq.

MIT-ip KAIR-illu ilanngaattissat ilanngaatigereerlugit angusaat, misissueqqissaarnermi tunngavigineqarput. Imaappoq, sanaartornermi aningaasartuutit, ingerlatsinermi aningaasartuutit, aningaasalersuinermi aningaasartuutit il.il. isertitat aningaasartuutillu tamakkerlugit eqqarsaatigereerlugit inaarutaasumik inernerit. Imaappoq, assersuutigalugu mittarfinnik ingerlatsineq immikkut ittumik aningaasartuutit ilaanngikkaluartoq, misissueqqissaarnermi ilaatinneqartoq.

Nuummi Ilulissanilu mittarfiit ammarnerisigut ineriartortitsinissamat sunniutissarpaaluussat naatsorsuutigineqartut naatsorsuusiorfigiuminaammata, misissueqqissaarnermi ilaatinneqanngillat. Matumani ilaatigut sunniuteqarluartussat naatsorsuutigineqarluutit takornarialerinermit ineriartortitsinissamat sunniutissat. Ilanngullugu ilisimatitsissutigineqassaaq, Rambøll Aviation naapertorlugu siunissami Nuummut Ilulissanullu toqqaannartumik timmisartoqartarnissaa, nassiussanut allakkanullu tunngatillugu ineriartortitsinissamat annertuumik aamma sunniuteqarsinnaamat. Imapik qulaallugu nassiussanik assartuisarnissaaq illoqarfinnut taakkununga marluusunut annerusumik pisassasoq naatsorsuutigineqarpoq. Toqqaannartumik timmisartoqartarneratigut Kangerlussuarmi nassiussanik usilersuisoqartarunnaassaaq, assartuinermi akigitat appassapput kiisalu Kangerlussuup Nuup/Ilulissat akornanni akunnittoqartarunnaassalluni. Tamatuma saniatigut timmisartukkut nassiussat tiguisussamat sukkanerusumik apuuttalissapput.

Tamatuma saniatigut belly cargotut (nalinginnaasumik ilaasunik timmisartuussinermi) nassiussisarluuni, siunissamilu timmisartumik assartuummik nassiussisarluuni aalisakkanik avammut tunisinerup ilaatigut annertusineqarnissaa siunertaralugu, kujataanut nassiussalerinerup ataqatigiissaarinerullu pitsanngorsarnissaannut periarfissaqassaaq.


Misissueqqissaarnermi inernernik sukuaianermi tamanna ilanngullugu isiginiarneqartariaqarpoq.

2 Eqikkaaneq, inerniliinerlu

Misissueqqissaarnerup takutippaa, Nuummi Ilulissanilu mittarfinnut 2.200 meterinik takitigisunut aningaasaliisoqaruni, inuiaqatigiit aningaasaqarnerinut iluanaarutissaq suli qajannaassasoq.

Nuummi Ilulissanilu mittarfinnut ullutsinni nalinga ukiunut 30-nut naatsorsoraanni, ataatsimut isigalugu inuiaqatigiit aningaasaqarnerinut pitsaasumik angusaqartoqarluni 700 mio. koruuninik angusaqartoqassaaq. Ullutsinni nalinga ukiunut 30-nut naatsorsoraanni iluanaarutit, aningaasartuutillu agguataarneqarnerat Takussutissiaq 4-mi takuneqarsinnaavoq.

Takussutissiaq 4: Nuummi Ilulissanilu mittarfinnut ullutsinni nalinga ukiunut 30-nut naatsorsorlugu (mio. koruuninngorlugu)



Sanaartornermi ingerlatsinermilu aningaasartuutit 900 mio. koruuninik qaffakkaluartut, inuiaqatigiit aningaasaqarnerat isigalugu suliniutit KAIR Internationalip akisussaaffigisaanik ingerlatissallugit suli isumatusaarnerusaaq. Matumani danskit akuunerisigut 2018-imi naatsorsuutigineqartumit KAIR International appasinnerungaatsiartumik ernialerlugit taarsigassarsitinneqarnissaminut periarfissaqalernera pingaarnertut patsisaavoq.

Tassunga ilanngullugu sanaartornermi aningaasartuutit qaffannerat aningaasalersorneqarnissaanni, nunatta karsianit aningaasaliisoqaqqittariaqanngilaq. Imaappoq, nunap nammeneq aningaasaatiminit KAIR Internationalimut aningaasaliinera suli 1,4 mia. koruunit missaaniippoq.

Illuatungaani aningaasartuutit qaffannerat aarlerinartunut annerulersitsippot, aningaasanimmieqqarsarluni suliniut anginerummat. Aningaasaliineq allanngortinneqarsinnaanani aningaasaliineruvoq, iluanaarutissatullu naatsorsorneqartut ukiut arlaqartut qaangiunnerini aatsaat takussutissaqalersinnaassallutik, iluanaaruteqassagaannilu suliaqartoqartariaqarluni.

Tassunga ilanngullugu, taarsigassarseqqinnermi inuiaqatigiinni suliniutinut allanut taarsigassarsitinneqarsinnaanissaq periarfissalutsissinnaavaa.

Teknikkimik eqqarsaraanni, aarlerinartumik pisoqassagaluarpad nunatta karsiata nammatassaa taakkuninnga 900 mio. koruuninik tamakkiisumik annerulingilaq. Uani taarsigasseqqiissutit 600 mio. koruuniusut Nationalbankimi taarsigasseqqinnertut taarsigassarsiarineqarnerat patsisaavoq. (danskita naalaaffiannut isumaqatigiissutit kinguneri kapitali 3-imi itisilissavagut).

KAIR Internationalimut 300 mio. koruuninik niuerfimmit taarsigassarsinermit, Namminersorlutik Oqartussat KAIR Internationalimut piginneqataanermikkut danskita naalagaaffiatulli aarlerinaammut akisussaaqataavoq.

Illuatungaani ineriartortitsinissamut sunniutissat ilanngunneqanngimmata, iluanaarutissat misissueqqissaarnermit matumani annikinaarneqarsimasinnaapput.

KAIR Internationalip akisussaaffigisaanni mittarfinnut taakkuninnga marluusunut tunngavinnik eqqarsaatersuuteqarnermit, mittarfinnik taakkuninnga marluusunik pilersitsinissamut tunngaviit assigiinngitsorujussuummata, eqqumaffigissallugu pingaaruteqarpoq:

- Nunatsinni illoqarfiit pingaarnersaata nunarsuup sinneranut atalernissaa, tikikkuminarnerulersinneqarnissaa kiisalu angallasseriaatsip piusup pisariinnerulersinneqarneratigut iluanaaruteqalernissaa, Nuummi nunanit tamalaanit mittarfimmik pilersitsinissamut pingaarnertut tunngavigineqarnikuupput. Aamma imaappoq, Nuummi mittarfiliornikkut pisariillisaanerit siunissami qaninnerusumi piviusunngussasut naatsorsuutigineqarpoq.
- Takornarissat amerlanerusut nunatsinnut takornariarsinnaanissaannik periarfikkumallugit, takornarialerisut tapersersorneqarnissaat Ilulissani nunanit tamalaanit mittarfimmik pilersitsinissamut pingaarnertut tunngavigineqarnikuuvoq. Timmisartumik angalasut amerlinissaasa saniatigut takornarialerinermit ineriartortitsinissamut sunniutissat, inuiaqatigiit aningaasaqarnerinut sunniutissanik misissueqqissaarnermit ilanngunneqarnikuunngillat. Imaappoq, ineriartortitsinissami sunniutaasussat isiginiarnagit Ilulissani ingerlatsinermit aningaasaqarniarneq misissoqqissaarneqaruni, Ilulissani periarfissat pillugit equngasumik assiliartaliissaaq.

Naatumik oqaatigalugu angallasseriaatsip piusup pisariinnerulersinneqarnissaa Nuummi tunngavigineqarpoq, Ilulissanullu tunngatillugu inuutissarsiutip siunissami ineriartortinneqarnissaa tunngaviulluni.

Ukiuni ataasiakkaani annertuumik nikerartussaagaluartoq, ukiut 15-it siumut isigalugit nunatta karsianut isumalluarnartumik amerliartortitsisoqassasoq, missingersuutini aningaasaqarnerup misissoqqissaarnerani takutippaa. Tassunga atatillugu missingersuutini aningaasaqarnerup misissoqqissaarnerani piffissap sivikinnera eqqumaffigissallugu pingaaruteqarpoq. Missingersuutini aningaasaqarnerup misissoqqissaarnerani piffissaq sivitsorneqaraluarpat, isumalluarnartumik angusaq annerussaaq.

3 Danskit KAIR Internationalimut akuunissaat pillugu isumaqatigiissutip kingunera

Namminersorlutik Oqartussat naalagaaffiullu akornanni 2018-imi isumaqatigiissutip kinguneraa:

- KAIR-ip immikkoortortaqrifiata KAIR Internationalip Nuummi Ilulissanilu mittarfiliornissaanut Namminersorlutik Oqartussat 1.400 mio. koruuninik sulii taperseeqataassasut
- 700 mio. koruuninik aningaasaatinut taperseeqataanertut kiisalu taarsigassarsiatut aamma taarsigassarsianut tunngatillugu qularnaveeqquusiinertut ilusilimmik naalagaaffimmit aningaasaqarnikkut taperseeqataanerup malitsigisaanik, KAIR malillugu KAIR-ip aningaasalersuinermit aningaasartuutissai annikillissasut
- Naalakkersuisut siunissami pisussaaffii annikillissasut, tamannalu siunissami aningaasaqarnermit politikkikkut atugassiisinnaaneq annertusitissavaa, tassami siunissami pigussaaffiit ilaannut naalagaaffik akuersimmat
- KAIR Internationalimi Nuummi aamma Ilulissani mittarfinnik sanaartornissamut ingerlatsinissamullu ingerlatseqatigiiffimmi immikkoortortaqrifiusumi piginnittuunerup 33,3%-anik naalagaaffik pigisaqalissasoq.

Soqutigisaqatigiit imminnut atanatik naligiimmik piginneqatigiillutik marluusut akornanni, niuerneq tunngavigalugu isumaqatigiissutigineqartoq ilisimatinneqarpugut. Tamatuma saniatigut isumaqatigiissut ima kinguneqarpoq:

- Atuisut akiliutaat appartinneqarsinnaassasut aamma/imaluunniit KAIR-imut sinneqartoorutaanerussaassasut
- Nuummi Ilulissanilu mittarfiliornermi ingerlatsinissamilu KAIR-ip ingerlatseqatigiiffimmi immikkoortortaqrifia, isumaqatigiinngissutinut atatillugu ingerlatseqatigiiffiup soqutigisaanik isumaginissinnaasunik maanna marlunnik piginittoqarmat, pisariaqassappallu ingerlatseqatigiiffimmut aningaasaliisinnaallutik piginnittut marluummata, KAIR qajannaannerulissasoq. Illuatungaani piginneqatigiinnermi piginnittut aaqqiagiinngissinnaasarpur, tamannalu KAIR-ip siunissami pilersaarusiukkamik ineriartortitsinissaanut unammillernarsinnaassalluni.
- Nuummi Ilulissanilu mittarfiliornerni Namminersorlutik Oqartussat annaasaqarsinnaanerup aarlerinaataanik kisermaassisussaajunnaartut, aarlerinartumili tassani Namminersorlutik Oqartussat Danmarkilu avitseqatigiittut (aarlerinartup taassumap avinneqarnissaani, piginnittuuneq pillugu isumaqatigiissummi qanoq ilusilerneqarnerneq apeqqutaavoq)
- Qaqortumi mittarfimmik Namminersorlutik Oqartussat kisimiillutik sulii piginnittuussasut, Qaqortumilu mittarfimmik sanaartornermi ingerlatsinermilu annaasaqarsinnaanerup aarlerinaataanik kisermaassillutik
- Nuummi Ilulissanilu naatsorsuutigisamik iluanaarutissat, naggataatigullu inuiaqatigiit iluanaarutissaat, piginnittuuneq pillugu isumaqatigiissut naapertorlugu pissusissamisoortumik Danmarkilu avinneqassasut
- KAIR ataasiinnarmik piginnittoqartillugu, Namminersorlutik Oqartussat taamatulli nammineq aalajangiisinnaassuseqanngitsut
- Nunani tamalaani taarsigassarsisarfinni taarsigassarsinernut nallersuunneqarluni Nationalbankip tamakkiisumik ilaannakortumilluunniit taarsigasseeqqinneratigut, KAIR International pitsaasunik atugassaqartinneqarluni 600 mio. koruuninik taakkuninnga taarsigassarsitinneqarnissaminut periarfissaqasassoq
-

3.1.1 KAIR Internationalip tungaanit isigalugu Danmarkimut isumaqatigiissutip aningaasaqarnikkut kingunissaa

Tulliuttut aallaavigalugit sanaartornissamut aningaasaliissutit aningaasalersorneqarnerisa ineriartornerat Takussutissiaq 5-imi takutinneqarpoq:


1. inuiaqatigiit aningaasaqarnerinut sunniutaasussanik 2018-imi aprillimi nalilersuinermit
2. Danmarkimip 2018-imi decembarimi KAIR-imut piginneqataalerneranit, kiisalu
3. nunanit tamalaanit mittarfinnik sanaartornermi ataatsimut aningaasartuutit 900 mio. koruunit missaannik massakut qaffannerinit. Taarsigassarsiat kiisalu Namminersorlutik Oqartussat naalagaaffiup namminneq aningaasaataasa agguaqatigiissinneratigut kiisalu taarsigassarsianit namminerlu aningaasaatit agguaqatigiissinneratigut tamanna takussutissiami takussusiorneqarpoq.

Takussutissiami takuneqarsinnaasutut, danskit naalagaaffiata aningaasaleeqataassutsinik akiliuteqarneratigut, 700 mio. koruunit avataanit aningaasalersuutaaqqaartut nammineq aningaasaliissutinngortinneqarput. Allatut oqaatigalugu, akiitsut erniallit 1.600 mio. koruuninit 900 mio. koruuninut appartinneqarput, 450 mio. koruunillu Nationalbankip taarsigasseeqqinneratigut aningaasalersorneqarlutik, sinneruttullu 450 mio. koruunit 2018-p ukiaani NIB-mi aningaasalersorneqarlutik.

Sanaartornermi ingerlatsinermilu aningaasartuutit 900 mio. koruuninik qaffaatit Nationalbankimit 600 mio. koruuninik taarsigasseeqqinnikkut, sinnerinullu 300 mio. koruuniusunut assersuutigalugu taarsigassarsisitsisarfinnit taarsigassarnikkut aningaasalersorneqassapput. Allatut oqaatigalugu aningaasartuutinut qaffaatit kingunerisaannik, Namminersorlutik Oqartussat siunissami qaninnerusumi KAIR Internationalimut aningaasaleeqqissanngilaq. Imaappoq, KAIR-ip ingerlatsinissamut aningaasalersuinissamullu pilersaarutaani kingullermik nutartikkami, avataanit aningaasalersuutit 1.800 mio. koruuninik qaffapput (tamanna takussutissami marts 2022-mi takussusiorneqarpoq).

Sanaartornermi aningaasartuutit nutaat kingunerisaannik KAIR-imut 900 mio. koruuninik aningaasaliinissaq Nationalbankip taarsigasseeqqinneratigut aningaasalersorneqassasut naatsorsuutigineqarpoq, taamaalillunilu avataanit tamakkiisumik aningaasaliissutigineqartut maanna 1.800 mio. koruunit missaanniillutik (tamanna Juni 2021-p nalaani takussuserneqarpoq).

Takussutissiaq 5: Nuummi Ilulissanilu mittarfinnut aningaasalersuineq



Karsit kalaallit erfasuunik erfasullit tassaapput Namminersorlutik Oqartussat nammineq aningaasaliissutai. Karsit danskit erfasuunik erfasullit tassaapput naalagaaffiup nammineq aningaasaliissutai. Illunik ilisarnaatililit tassaapput taarsigassarsinikkut aningaasalersuutit.

Akiitsut erniallit 2018-imi apriliimit kingullermik 2022-mi februaarimi nutarterinermik 200 mio. koruuninik qaffapput. Tamaat isigalugu tamakkiisumik aningaasaatinut ajorseriaataassaaq, tulliuuttumili tabel 1-mi takuneqarsinnaasutut taamatut pisoqassanngilaq, Danmarkimi naalakkersuisut KAIR-imut ilanngunnerisigut 2018-imi aprili aallaavineqaaqqaartutut KAIR erniatigut iluanaarnartumik atugarissaarmat.

Nunani tamaalanit mittarfinnut taakkununga marluusunut naalakkersuisut taarsigassarsianik, qularnaveeqqusiusassanillu atugassiinera iluanaarnarnerusumik atugassarititaasunut patsisaavoq. Tabel 1-imi takuneqarsinnaasutut taarsigassarsiat akilersorneqarfissaanni tamakkiisumik akiliutissat 2018-imi decembarimut sanilliullugu 2022-mi februaarimi 1.270 mio. koruunit missaannik qaffasinnerupput, 2018-imi apriliimit sanilliullugu 305 mio. koruunit missaannik appasinnerullutik, naak taarsigassarsiat 200 mio. koruunit missaannik qaffasinnerugaluartut. Iluanaarnarnerusumik atugassarititaasut ima paasineqassapput, 2022-mi februaarimut erniatut nalilerneqartoq 1,87 procentiusoq, 2018-imi inuiaqatigiit aningaasaqarnerinut sunniutissaanik misissueqqissaarnermi erniaa 4,00 procentimut missiliorneqarluni.

600 mio. koruunit missaannik taarsigasseeqqissutit nutaat taakkua ukiuni 25-ni akilersorneqassasut naatsorsuutigineqarpoq, tamannalu 450 mio. koruuninik taarsigasseeqqissutaaqqaartunut assigaa, taarsigassarsisitsisarfinniillu taarsigassiissutigineqartut ukiuni 20-ni taarsorneqassallutik. Imaappoq, 2022-mi marsimi taarsigassiissutigineqartut ukiuni 22-t missarluinnaani akilersorneqassasut. .

2022-mi marsimi erniassatut nalilerneqartoq erniarititaaqqaartunut 4,00 procentinut iluarsineqarpat, ukiullu 25-t akilersorneqassappata, akiliutissat tamakkiisut 2.880 mio. koruunit missaanniissagaluarpot.

Eqikkaassagaanni taamaalluni avataanit aningaasaliissutit tamakkiisut 2018-imi apriliimit, 2022-mi februaarip tungaanut 200 mio. koruunit missaannik qaffapput. Erniatigut

pitsaanerusumik atugassarititaasut ilanngullugit eqqarsaatigigaanni, KAIR International kisiat aallaavigigaanni ataatsimut isigalugu allannguutit killeqassapput.

Tabel 1: KAIR Internationalip ataatsimoortillugit akilersugassai²

Akilersugassat ataatsimoortillugit	Mio. Kr. / %	April 2018	December 2018	Marts 2022
Akiligassaviit	mio.kr.	1.600	900	1.800
Akilersorfissaa (nalilerlugu)	år	25	20	22
Erniat (nalilerlugu)	%	4,00%	0,77%	1,87%
Ukiumut akiliutissat	mio.kr.	102	67	134
Akiliutissat katillugit	mio.kr.	2.560	986	2.256
<i>taakkunanga erniat</i>	<i>mio.kr.</i>	<i>960</i>	<i>86</i>	<i>456</i>

Aningaasartuutit 900 mio. koruuninik annertusisut Nationalbankip taarsigasseqqinneratigut tamakkiisumik aningaasalersorneqartut, KAIR Internationalip ingerlatsinerimi aningaasalersuinermilu pilersaarutaani kingullermik (2021-mi septembarimi) nutarterneqartumi Aallaavigineqarput. Taarsigassarseqqinnermi, ilutigalugu taarsigassarsisitsisarfirmmit taarsigassarsinerimi KAIR Internationalip ingerlatsinerimi angusai 2049 tikillugu 250 mio. koruunit missaannik negativimik sunnerneqassapput. Imaappoq, KAIR Internationalip ingerlatsinerimi sinneqartooruteqarnissaanik naatsorsuuteqarneq – pingaartumik 2025-mit 2029 tikillugu – annikillissasoq, soorluttaaq KAIR Internationalip ingerlatsinerimi sinneqartoorutaasa atorsinnaanerit assingani annikillissasoq.

Naatsorsuutigisamik KAIR Internationalip ingerlatsinerimi sinneqartoorutissaasa atorneqarnissaannut, pingaarnertut marlunnik periarfissaqarpoq:

1. Angalasussanut iluaqtissanngorlugit kiisalu ingerlatsinissamik, aningaasalersuinissamillu pilersaarutitigut ineriartortitsinissamik naatsorsuutigineqartoq qulakkeerumallugu (assersuutigalugu billetsit akikillinerisigut, atugassarititaasut pitsanngorsarneqarnerisigut, akulikinnerusumillu angallassisoqartalernissaanut atugassarititaasut pitsaasuutinnerisigut) sinneqartoorutit mittarfinnut KAIR Internationalimullu aningaasaliissutigineqaqqissinnaapput, imaluunniit
2. Sinneqartoorutit tamakkerlugit ilaannakortumilluunniit piginnittunut iluanaarutit tunniunneqarsinnaapput (67 procentit Namminersorlutik Oqartussanut, 33 procentillu Naalagaaffimmut)

Aningaasartuutit qaffaataat taarsigassarsinikkut tamakkiisumik avataanit aningaasalersorneqartussaammata, sanaartornermi aningaasartuutit qaffaataat Nunatta Karsianit qaavatigut aningaasaliiffigineqartariaqanngillat.

² Procenti ernialiuussatut allassimasumut erniassatut nalilerneqartoq, qularnaveeqqusissutinit iluanaarutit suliarinerani akissarsiat kiisalu taarsigassarsianut ataasiakkaanut akilersuutissat KAIR-ip isummersuuteqarneratigut inissinneqarput.

4 Tunngavigisat

Inuiaqatigiit aningaasaqarnerinut sunniutissanik naliliinermit tunngavigineqartut immikkoortumi matumani sammeneqarput. Aalajangiinissami naammattumik tunngavissaqarnissaq qulakkeerumallugu sammeneqarput.

4.1.1 Nuummi Ilulissanilu mittarfinnik atuilerneq

Imarpik qulaallugu timmisartuussinernut mittarfissat taakkua marluk 2024-p ukiaani aammassasat naatsorsuutigineqarpoq. KAIR Internationalip taarsigassarsiai kingullit 2049-mi akilereerneqartussaammata, inuiaqatigiit aningaasaqarnerinut sunniutissanik naliliinermit, 2021 aallartiffigalugu 2050 ilanngullugu ukiut 30-t aallaavigneqarput. Najoqqutassap ukiup siullianit 2021-mit 2024 ilanngullugu ukiuni sisamani sanaartortoqassasoq ilimagineqarpoq. Tassangaanniit Imarpik qulaallugu timmisartuussinerit 2025-mi januaarip aallaqqaataanit Kangerlussuarmit Nuummi Ilulissanilu mittarfinnut nuutsinneqassapput. Taamaalilluni mittarfiit taakkua marluk ammarnersigut iluanaarutissat naatsorsuutigineqartut katillugit ukiunut 26-nut naatsorsorneqarput.

4.1.2 Nuummi Ilulissanilu mittarfiit akornanni iluanaarutissat, aningaasartuutissallu agguaqatigiissinnerat

Nuummi Ilulissanilu mittarfinni naatsorsuutigisamik iluanaarutissat aningaasartuutissallu ataatsimoortillugit, misissueqqissaarnermi missiliorneqarput. Tamatuma saniatigut iluanaarutissat aningaasartuutissatullu naatsorsorneqartuni qanoq annertutigisut Nuummut Ilulissanullu tunngassuteqartussat naatsorsuutigineqartut takuneqarsinnaaniassammata, inuiaqatigiit aningaasaqarnerini inernerit mittarfinnut taakkununga marluusunut immikkoortinneqarput.

Iluanaarutissat aningaasartuutissallu ataasiakkaat mittarfimmumt pineqartumut toqqaannartumik immikkoortinneqarsinnaapput. Iluanaarutissanulli aningaasartuutissanullu amerlanersaannut tunngatillugu aningaasartai avinneqarsinnaangimmata, agguataarinissami tunngavik tunngavigineqarpoq. Taamaattumik erseqqissaatigissavarput, iluanaarutissanik aningaasartuutissanillu ataasiakkaanik Nuummut Ilulissanullu agguataarinermi kisitsisit ilaat eqqoqqissaaratik, agguataarinermi missiliuineq aallaavigneqarmat. Iluanaarutissaq aningaasartuutissarlum sumut tunngassuteqarnerisooq apeqqutaatillugu, Nuup Ilulissallu akornanni agguataarinissamik tunngaviit assigiinngitsut pingasut misissueqqissaarnermi aallaavigneqarput:

- Angalanermi aningaasartuutit annikillinerisigut, angalanerup sivikillineratigut, nerisassanut unnuisarfinnullu aningaasartuutit annikillinerisigut iluanaarutini Rambøllip angallassinissamut siulittuutigisai naapertorneqarput, tassani Kangerlussuarmit Imarpik qulaallugu angalasartut 66 procentii siunissami Nuukkoortalernissaat, 33 procentillu Ilulissatigoortalissasut missiliorneqarmat.
- Angallannerup sinnerata pisariinnerulerneranut, 2021-mit 2024 tikillugu Kangerlussuarmit mittarfimmik ingerlatsinerumt, 2024-p kingorna MIT-ip isertitakinneqarneranut kiisalu KAIR-ip aningaasaataasa ineriartornerinut atatillugu iluanaarut aningaasartuutillu, 2018-imi misissueqqissaarnermi Alloriarneq 2-mi mittarfinni tamani sanaartornissami aningaasartuutissat saqqummiunneqaaqartut tunuliaqataralugit, agguataarinermi tunngavik malillugu agguataarneqarput. Nuummi mittarfimmumt 54 procentit missaat, Ilulissanilu mittarfimmumt 46 procentit missaat.
- Kiisalu Namminersorlutik Oqartussat KAIR Internationalimut aningaasaleeqataassutsinik akiliutigisaanni, KAIR-imut aningaasaleeqataassutsinik akiliutit 2018-imi misissueqqissaarnermi Alloriarneq 2-mi atorineqartut aallaavigneqarput. Akiliutit taakkua ilaat Qaqortumi mittarfimmumt immikkoortinneqarmata, akiliutit agguataarneqaaqarnerat malillugu aningaasaleeqataassutsinik akiliutit immikkoortinneqarput, taakkunanga 35,8 procentit missaat Nuummut, 33,5 procentillu Ilulissanut.

Agguataarinermi tunngaviit atornerqarnerat immikkoortumi tulliuttumi itisilissavarput.

4.1.3 Angalasunik angallassineq, angalanermi aningaasartuutit annikillinerat, angalanerullu sivikillinera

Angalanermi aningaasartuutit annikillinerisigut, angalanerullu sivikillineratigut iluanaarutissat naatsorsorsinnaaqullugit, ilaatigut Nuummit Ilulissaniillu ukiumut qanoq amerlatigisut angalasartussatut naatsorsuutigineqarnerisut, ilaatigut angalasunit taakkunannga qanoq amerlatigisut Kangerlussuakkoortariaarullutik Nuummukarnerisut Ilulissiarnersullu kiisalu misisseqqissaarnermi naatsorsuinermit ilanngunneqassallutik angalasunit taakkunannga qassit inuiaqatigiinnut tunngassuteqarnerisut misissorneqartariaqarpoq.

Imarpik qulaallugu naatsorsuutigisamik angallassinissami tunngavigisani, Rambøllip angallassinissamut siulittuutigisai tunngavigineqarput. Nuummi Ilulissanilu mittarfiit 2025-p aallartinnerani atulissasut, Kangerlussuarmullu imarpik qulaallugu angallavik atorunnaarsinneqassasooq siulittuuteqarnermi naatsorsuutigineqarpoq.

Tamatuma saniatigut ullumikkut Kangerlussuamit aallartartut 66 procentii, 2024-p kingorna Nuummiit aallartalissasut siulittuuteqarnermi naatsorsuutigineqarpoq. 33 procentii Ilulissanit aallartalissasut naatsorsuutigineqarpoq. Nunami sumiiffinnut allanut ingerlaqqittussanut, mittarfiit taakkua marluk aamma akunnittarfiussaput.

MIT-ip 2016-imit 2019 tikillugu kisitsisaatai siulittuummi aallaavigineqarput, ukiumullu ineriartorneq 2 procentimik iluarsiissuteqarfigineqartarluni. Mittarfiit ammarnerinit ukiumut pingasunut siullernut (2025-2027) tunngatillugu angalanermi aningaasartuutit annikillinerisa, angalanerullu sivikillinerata kingunerisaanik nalinginnaangitsumik qaffariaateqassasooq naatsorsuutigalugu, 2 procentit taakkua saniatigut angalasut 5 procentinik amerleriassasut aallaavigineqarpoq. Corona patsisaalluni ukioq 2020 aallaavigineqanngilaq. Imaappooq, 2020-mi kisitsisit atornerqaratik, 2019-imi angalasut 2 procentimik iluarsiissuteqarfigineqartut. Malugalugu angalasunik angallassineq ineriartussappat, ineriartorneq taanna anguneqassappat tassunga ataavartumik aningaasaliisoqartariaqarmat (assersuutigalugu billetsit akikillinerisigut, atugassarititaasut pitsanngorsarnerisigut, aallartarnerit akulikinnerunerisigut assigisaallu).

Angalasut Type 1-it Type 2-llu


Angalanermi aningaasartuutit annikillinerisa, angalanerullu sivikillinerata nalinga naatsorsorsinnaaqullugu, Imarpik qulaallugu timmisartuussisarnerup Kangerlussuarmut Nuummut Ilulissanulluunniit nuunneqarnerani angalasut immikkoortunut marluusunut avinneqartariaqarput:

- Type 1 – angalasut Nuummukartut Ilulissiatulluunniit
- Type 2 – angalasut Nuuliatillu Ilulissiannigisut, sivikinnerusumilli angalalersartussat.

2018-imi misissueqqissaarnermi Alloriarneq 2-mut atatillugu Rambøllip nalilerpaa, Imarpik qulaallugu timmisartuussisarnermi angalasut 68 procentit missaanniittut Nuuliarlutillu Ilulissiatassasut, taamaalillunilu Kangerlussuarmut akunnittussaajunnaarnermikkut sipaaruteqassasut.


Assinganik agguataarinermi tunngavik naapertorlugu angalasut Type 1-t angalanermi aningaasartuutikinnerulersinnaasut, sivikinnerusumillu angalalersinnaasut misissueqqissaarnermi matumani immikkoortippagut. Imarpik qulaallugu timmisartuussinermi 2025-mi Nuummit Ilulissaniillu aallartut tikittullu 199.000 missaanniissangatinneqarput. Taakkunannga 135.000-it missaat mittarfinnit taakkunannga marluussunit angalanertik aallartillugulu, ingerlariaqqittussaanaatik tikiffigisassagaat naatsorsuutigineqarpoq.

Takussutissiaq 6: Angalasut Type 1-t ingerlaqqittussaananik Nuummut Ilulissanulluunniit angalasassapput (68 procentit)



Imarpik qulaallugu timmisartuussinermi angalasut sinneruttut 32 procentii Type 2-jupput. Taakkua angalanermi aningaasartuutinik sipaaruteqassanganneqanngillat, angallasseriaatsilli pisariinnerulersinneqarneratigut, ullumikkumullu sanilliullugu tikiffissaasa qaninnerulernerisigut angalanerat sivikillisinnaassalluni.

Takussutissiaq 7: Angalasut Type 2-t illoqarfinnut, nunaqarfinnullu allanut angalasut (32 procentit)



Inuiaqatigiinnut attuumassutilimmik, inuiaqatigiinnullu attuumassuteqanngitsumik angalasut

Angalanermi aningaasartuutit annikillisinnaanerinut, angalanerup sivikillisinnaaneranut kiisalu unnuisarfinnut nerisassanullu aningaasartuutit annikillisinnaanerannut periarfissat misissueqqissaarnermi paasineqartillugit, Imarpik qulaallugu timmisartuussinermi angalasuni inuiaqatigiinnut attuumassutilimmik angalasut kisimik misissueqqissaarnermi naatsorsuusiorfigineqarput. Taamaattumik Imarpik qulaallugu timmisartuussineq inuiaqatigiinnut attuumassutilimmik angalasunut, inuiaqatigiinnullu attuumassuteqanngitsumik angalasunut avinneqartariaqarpoq.


Inuiaqatigiit aningaasaqarnerinut sunniutissat misissueqqissaarnermi ukkatarineqarnerinik tamanna patsiseqarpoq, taamaalillunilu inuiaqatigiinnut attuumassutilimmik angalasunut iluanaarutaasinnaasut kisimik misissueqqissaarnermi ilaatinneqarlutik. Inuiaqatigiinnut attuumassuteqanngitsumik angalasut assersuutigalugu tassaapput nunatsinnut toqqaannartumik attuumassuteqaratik takornarissat, atorfimminnullu atatillugu angalasut.

Inuiaqatigiinnut attuumassutilimmik angalasut tassaapput Kalaallit Nunaanni najugaqartut kiisalu angalasut toqqaannartumik, toqqaannangitsumilluunniit Namminersorlutik Oqartussanit, kommuniniilluunniit akiliunneqartut

Imarpik qulaallugu timmisartuussinermi angalasut affai inuiaqatigiinnut attuumassuteqassasut, affailu inuiaqatigiinnut attuumassuteqassanngitsut naatsorsuutigineqarpoq. Taamatut naatsorsuuteqarneq tulliuuttumik aallaaveqarpoq:

- Naatsorsueqqissaartarfiup 2019-imut naatsorsuutai naapertorlugit, angalasunit Kalaallit Nunaanni najugaqartut agguaqatigiissillugu 37 procentit missaanniipput. Inuiaqatigiinnut attuumassutilimmik angalasut kisitsisaatigineqanngimmata, angalasut Kalaallit Nunaanni najugaqartut tamarmik inuiaqatigiinnut attuumassuteqartutut misissueqqissaarnermi naatsorsuutigineqarput.
- Tamatuma saniatigut naatsorsuutigineqarpoq, Danmarkimi najugaqarlutik angalasut affaat (31 procentit) inuiaqatigiinnut attuumassuteqartut. Matumani Danmarkimi najugaqaratik angalasut sinnerlugit toqqaannanngikkaluamik imaluunniit toqqaannartumik Namminersorlutik Oqartussanit, kommuninit, ingerlatseqatigiiffinnit namminersortunit, immaqalu inuinnarnit akiliunneqarlutik Imaprik qulaallugu angalasut ilanngunneqarput.
- Ataatsimut isigalugu agguaqatigiissillugu naatsorsuutigineqarpoq, imarpik qulaallugu timmisartuussinermi angalasut 50 procentii³ inuiaqatigiinnut attuumasseqartut, sinneruttullu 50 procentit inuiaqatigiinnut attuumassuteqanngitsut. Tamanna Takussutissiaq 8-mi takussusiorneqarpoq.

Takussutissiaq 8: Imaprik qulaallugu timmisartuussinermi angalasunut inuiaqatigiinnut attuumassuteqartunut tunngavigineqartut



Aallerfik: Kalaallit Nunaanni Naatsorsueqqissaartarfik

Oqaatigineqareersutut angalasut inuiaqatigiinnut attuumassuteqanngitsut, assersuutigalugu takornarissat, iluanaarutaasinnaasut misissoqqissaarneqarnerini ilaatinneqanngillat. Taamaakkaluartoq angalasut inuiaqatigiinnut attuumassuteqanngitsut, aningaasaqarnermut sunniuteqarluarsinnaasumik ineriartortitsinermut sunniuteqarsinnaapput. Ineriartortitsinissamut sunniutissat nalingat misissueqqissaarnermi naatsorsusiorfigineqarsinnaasimangilaq, qularutissaanngilarli takornarialerineq aningaasaqarnermut sunniuteqarluassammat. Taamaattumik misissueqqissaarnermi inernernik sukuiaanermi tamanna ilanngullugu isiginiarneqartariaqarpoq.

³ Eqqartuereernikkut naatsorsuutigineqarpoq, taamaalluni inuiaqatigiinnut attuumassuteqarlutik angalasut ukiumut aamma amerlissasut. Siunissami inuiaqatigiinnut attuumassuteqarlutik, inuiaqatigiinnullu attuumassuteqaratik angalasut qanoq katitigaassanersut ilisimaneqanngilaq, siunissamili aningaasaatit kingumoortumik iluarsineqartussaammata, siunissami ungasinnerusumi naatsorsuutigisamik iluanaarutissat inuiaqatigiit aningaasaqarnerini inernernit appasinnerusumik naleqartussaanerisigut ersersinneqarlutik. Taamaalluni siunissami ungasinnerusumi iluanaarutissat aningaasartuutissallu, siunissami qaninnerusuminnarnit appasinnerusumik nalilerneqarput.

Angalasunut Type 1-inut angalanermi aningaasartuutit ikilinerat

Kangerlussuarmut Nuummullu imaluunniit Ilulissanut angalanartilluni ukiup qanoq ilinerani angalasoqarniarnersoq, qaqugukkut billetsisisoqarnersoq, sapaatip akunnerani ulloq suna angalasoqarniarnersoq, billetsip suussusaa kiisalu Imaprik qulaallugu angalanissaq ilanngullugu billetsisisoqarnersoq apeqqutaasarpog. Taamaattumik siumuinnaq angalanissamat billetsia aamma nikerarsinnaasarpog. Imaprik qulaallugu timmisartuussinerni angalasut akunnillutik siumuinnaq angalanissaat, naliliinikkut Rambøllip naliliinera malillugu 1.000 koruuninut agguaqatigiissinneqarnera, 2018-imi misissueqqissaarnermi Alloriarneq 2-mi aallaavigneqarpoq. Misissueqqissaarnermi matumani atugassatut missiliuut taanna, 2021-mi akigititat naapertorlugit aningaasat naleerukkiartornerinik iluarsiiqqineqarluni 1.053 koruuninut iluarsineqarpoq.

2025-mi 135.000-it missaanniittut Nuummullu Nuummiillu kiisalu Ilulissanut Ilulissaniillu angalasussatut naatsorsuutigineqartunut, 2021-mi akigititat naapertorlugit angalanermi aningaasartuutit 142 mio. koruunit missaannik ikilissangatinneqarput. Taakkua affai, imaappog 71 mio. koruunit missaat, inuiaqatigiinnut attuumassuteqarmata, misissueqqissaarnermi ilanngunneqarput.

Angalasunut Type 1-nut angalanerup sivikillinera

Angalanermi aningaasartuutissatut naatsorsuutigineqartut saniatigut, mittarfinnik aqqissuusseqqinnerup kingunerisaanik angalaneq sivikillissussaavoq. Rambøllip naliliinera naapertorlugit, Imaprik qulaallugu Nuummullu Nuummiilluunniit imaluunniit Ilulissanut Ilissaniilluunniit angalasut agguaqatigiissillugu Kangerlussuarmi akunnerni marlunni akunnittarput, akunnermillu ataatsimik sivirusunerusumik timmisartortarlutik. Taamaalluni Nuummullu Ilulissanulluunniit toqqaannartumik angalasalernikkut, angalaneq akunnerit pingasut missaannik sivikillissinnaalissaq.

Nalunaaquttap akunnera ataaseq piffissap angalaffiusussap sivikillerata nalinga, Takornariartitsineq - Mittarfiit ilusaasa allannortinnerisigut ineriartorneq siuarsanerlu pillugu 2015-imi nalunaarusiatigut Rambøllip missiliorpaa, taannalu 2021-mi akigititat naapertorlugit aningaasat naleerukkiartornerinik iluarsiiqqineqarfigigaanni 140 koruunip missaanniilluni. Malugalugu aningaasanut toqqaannartumik tuttussaangimmata, angalasulli angalanermi piffissaq atugaannut periutsit ilisimaneqartut naapertorlugit naatsorsuusionerummat.

Siuliani kisitsisit saqqummiunneqartut aallaavigalugit, Kangerlussuakkoorani mittarfiit taakkua marluusut arlaannut toqqaannartumik angalanermi angalanerup sivikillinerata nalinga, 2025-mi 61 mio. koruuninut missiliorneqarsinnaavoq. Taakkunannga 50 procentit inuiaqatigiinnut attuumassutilimmik angalanerummat, misissueqqissaarnermut ilaatinneqarput.

Angalasunut Type 2-nut tikitassaannut allanut angalassinermi pisariillisaaneq

Angalasunut Nuummukaratillu Ilulissartussaangitsunut angalanermi aningaasartuutit aamma annikillissangatinneqarput. Nunap immikkoortortaani sumut angalanersut apeqqutaassamat, qanoq annertutigisumik annikillissanersoq ilisimaneqaaqqissaangilaq. Tikitassat qaninnerulernerisa kingunerisaanik kilometerimut 3,2 koruunit sipaarutigineqartalersinnaanerinik Rambøllip missiliuutigisaa, 2018-imi misissueqqissaarnermi Alloriarneq 2-mi atorneqarpoq. Kangerluussuup Nuummilu nunap immikkoortortaani tikitassat, Ilulissanilu nunap immikkoortortaani tikitassat ungasissusii malillugit missiliuutit suliarineqarput. Aningaasat naleerukkiartornerinik siumut naatsorsoraanni 2025-mi ukiumut 8 mio. koruunit missaannik naleqassaaq, angalanermilu aningaasartuutit annikillisit affaat inuiaqatigiinnut attuumassutilimmik angalanerummat attuumassuteqassasut ilimagineqarluni.

Angalanermi aningaasartuutit annikillinerisa saniatigut, Nuummiit Ilulissaniillu sumiiffinnut allanut angalanermi, angalaneq sivikinnerusinnaavoq. Taamaakkaluartoq piffissaq sipaarneqartussaaq, nalornineq patsisaalluni missiliorneqangilaq.

4.1.4 Nerisassanut unnuisarfinnullu aningaasartuutit annikillinerat

Nuummi Ilulissanilu mittarfiit ammarnerisa kingunerisaannik angalanermi aningaasartuutit annikillinissaannik, angalanerullu sivikillinissaannik naatsorsuuteqarnerup saniatigut, angalasut ilaat unnuisariaarutissasut, taamaalillunilu nerisassanut unnuinissamullu aningaasartuutit annikillinissaassagaat aamma naatsorsuutigineqarpoq. Matumani ullutsinni angallassinissamik pilersaarut malillugit, pisut amerlanersaanni angalasut unnuinermut nerisassanullu aningaasartuuteqartariaqarlutik, ulloq ataaseq angalassariaqartarmata.

Angallassinissamik pilersaarut pitsaanerusoq malillugu angalasut Kangerlussuakkoortat Nuummut Ilulissanulluunniit toqqaannaq angalasinnaagunik, assersuutigalugu ullaakkut Danmarkimit Nunatsinnut aallarunik, ulloq ataasiinnaq angalasinnaalissapput. Taamaalilluni unnuinissamut nerisassanullu aningaasartuutit annikillinissineqarsinnaapput.

Aningaasartuutit annikillinissineqarsinnaassanersut, ingerlatsisut angallassinissamik pilersaarutaat, maannangaarlu ilisimaneqarani angalasseriaatsimi nutaami qanoq akulikitsigisumik/akuttutigisumik angallassinissanersut aalajangiisuusaaq. Taamaattumik qanoq annertutigisumik annikillinissanersut ersarissumik oqaatigineqarsinnaanngilaq, 2018-imili misissueqqissaarnermi Alloriarneq 2-mi Rambøll eqqoriaakannerluni missiliuteqarluni. Tassani eqqoriaalluni missiliorneqarpoq, angalasut Type 1-it Danmarkimi Nunatsinniluunniit unnuinissaraluamut nerisassarsiniutissaraluannullu 2.000 koruunit missaat sipaarutigissagaat. Aningaasat naleerukkiartornerinik siumut iluarsisuteqaraanni, 2021-mi akigitat malillugit inuiaqatigiinnut attuumassutilimmik angalasunut 2.107 koruuniuvoq, 2025-milu 30 mio. koruunit missaanniissalluni.

4.1.5 KAIR Internationalimut aningaasaleeqataassutsinik akiliutit, sanaartornermiillu ilanngaateqanngitsumik isertitat

KAIR-imut aningaasaleeqataassutsinik akiliutaaqqaartut 2 mia. koruunit missaanniittut ilaat, KAIR Domesticip akisussaaffigisaanik sanaartorneqartussamut Qaqortumi mittarfimmu immikkoortinneqarput. Taamaattumik 2018-imi misissueqqissaarnermi Alloriarneq 2-mi agguataarineq tunngavigalugu, aningaasaleeqataassutsinik akiliutit ilaannaat misissueqqissaarnermi matumani ilaatinneqarput. Agguataarinermi tassani naatsorsuutigineqarpoq, akiliutaaqqaartunit 35,8 procentit missaat Nuummi mittarfimmu, Ilulissanullu 33,5 procentit missaat immikkoortinneqassasut. Imaappoq, misissueqqissaarnermi naatsorsuutigineqarpoq, KAIR Internationalip Nuummi Ilulissanilu mittarfilioreranut, ataatsimut isigalugu Namminersorlutik Oqartussanit 1.438 mio. koruunit missaat akiliutigineqassasut.

Iluanaarutit aningaasartuutillu inuiaqatigiinnut tunngasut inuiaqatigiit aningaasaqarnerinut sunniutissaanik misissueqqissaarnermi kisimik isiginiarneqartussaammata, KAIR Internationalimut danskit naalagaaffiata aningaasaleeqataassutsinik akiliutaat misissueqqissaarnermi ilanngunneqanngillat, soorluttaaq KAIR Internationalip akiliisinaassutsitigut ineriartornerata naatsorsornerani naalagaaffiup pigisaa assinganik aaqqiiffigineqartoq.

4.1.6 Sanaartornermiit ilanngaatitaqanngitsumik isertitat

Mittarfinnik takkuninnga marluusunik sanaartornermut atatillugu, sanaartugassanut avataanit suliarortunik pisariaqartitsisoqassasoq naatsorsuutigineqarpoq. Taamaalilluni avataaniit suliarortut inuiaqatigiinnut ilanngaatitaqanngitsumik akileraassasut naatsorsuutigineqarpoq.

Sanaartornermit 2021-mi ilanngaatitaqanngitsumik akileraarutitigut isertitassat 22 mio. koruunit missaanniissangatinneqarput. Ilanngaatitaqanngitsumik akileraarutitigut isertitassat taakkua, misissueqqissaarnermi matumani aallaavigineqarput. 22 mio. koruunit Nuummi mittarfimmu tunngassuteqarmata, 2022-mi 2023-milu Nuummi Ilulissanilu mittarfiliorerit ingerlallualerpata, ilanngaatitaqanngitsumik akileraarutitigut isertitassat 44 mio. koruunit missaannik qaffassasut misissueqqissaarnermi naatsorsuutigineqarpoq. Ukiumi sanaartorfiusussatut kingullertut naatsorsuutigineqartumi 2024-mi, sanaartornerit inaarsarneqarneri ilutigalugit sanaartorneq annikillissasoq naatsorsuutigalugu, 22 mio. koruunit naatsorsuutigineqarput.

4.1.7 KAIR Internationalimi akiliisinnaassutsip ineriartornera

Nuummi Ilulissanilu mittarfiit 2024-p naanerani ammarnissaannut periarfissaasumi KAIR Internationalip ingerlatsinissamut aningaasalersuinissamullu pilersaarutimi 2021-mi septembarimi nutartigaa, KAIR Internationalip akiliisinnaassusiata ineriartortinnerani aallaavigineqarpoq. Namminersorlutik Oqartussat KAIR Internationalimi ullumikkut 2/3-imik piginneqataammata, naalagaaffik 1/3-mik piginneqataammat, naalagaaffiup piginneqataassusiat aqqiivigineqarluni akiliisinnaassutsip ineriartornerata 2/3-iinnaa inuiaqatigiit aningaasaqarnerinut sunniutissanik misissueqqissaarnermi ilaatinneqarpoq.

Akiliisinnaassutsip ineriartornerani aningaasaliissutaaqqittut ilanngunneqarput. Akiliisinnaassutsit ataavartumik iluanaarutit piginnittunut tunniunneqartassanersut, ingerlatseqatigiiffimmiluunniit aningaasaliissutigineqaaqqittassanersut ilisimaneqanngilaq. Akiliisinnaassutsip ukiumit ukiumut assigiinngissutaata misissorneratigut, akiliisinnaassutsip ineriartornera misissueqqissaarnermi naatsorsorneqarpoq. Mittarfiit 2025-mi naammassinissaat naatsorsuutigineranit, ukiunilu ingerlatsinermi pitsaasumik missingersuutitigut angusaqarfiusunit (EBT), imaappoq 2026-mit siunissamut, akiliisinnaassutsip ineriartornera naatsorsorneqarpoq.

Tassunga tunngatillugu oqaatigineqassaaq, KAIR Internationalip ingerlatsinissami aningaasalersuinissamilu pilersaarutaani nutartikkami akilersueriaasissaa patsisaalluni, akiliisinnaassuseq 2033-mit 2034-mut kiisalu 2043-mit 2044-mut apparissammat. Akiliisinnaassutsimi appariaatissanut taakkununga akiliisinnaassutsip naatsorsuutigisamik ineriartornissaani "katersisoqarpoq", taamaattumillu imaanngilaq iluanaarutit tunniussinissamut periarfissanik akiliisinnaassutsip ineriartornera takussutissiisoq. Allatut oqaatigalugu, KAIR Internationalip akiliisinnaassusia piffissap ingerlanerani ineriartussanersoq, ingerlatseqatigiiffiup akiliisinnaassusaata takutippaa. Akiliisinnaassutsinik taakkunanga, ukiut ingerlanerini assersuutigalugu ukiumut qanoq annertutigisut piginnittunut iluanaarutit tunniunneqarsinnaassanersut, misissueqqissaarnikkut nalilerneqarsinnaasimanngilaq, tamanna piginnittut akornanni isumaqatigiissutigineqassammat.

4.1.8 Nuummi Ilulissanilu mittarfinni piusuni kiisalu Kangerlussuarmi 2024 ilanngullugu ingerlatsinermi inernerit

Nuummi Ilulissanilu mittarfiit piusut ullumikkut MIT-ip ingerlatarei. Taamatulli Kangerlussuarmi mittarfik MIT-ip ingerlatarea. Nuummi, Ilulissani Kangerlussuarmilu 2021-mit 2024 tikillugu ukiumut ingerlatsinermi angusassat MIT-ip missiliuteqarfigai, taakkuala misissueqqissaarnermi ilaatinneqarlutik.

Mittarfiit nutaat ammarnissaannut pilersaarutaaqqaartumut sanilliullugu mittarfinnik sanaartorneq kinguaattooqqavoq, tamatumalu ilutigisaanittaaq Imarpik qulaallugu timmisartuussinerit ilimagineqaaqaartumit sivisunerusumik Kangerlussuarmut aallaaveqassallutik. Kangerlussuarmi mittarfiup piusinnaassusaa 2024-p naanerata tungaanut sivitsorsinnaaqullugu, mittarfimmut aningaasaleeqqittariaqarnerit missiliorneqarput. Kangerlussuarmi mittarfimmut tunngatillugu ingerlatsinermi angusassatut missingersuusiariartut, mittarfiullu sivisunerusumik piusinnaanissaanut aningaasaleeqqinnissat qupperneq XX-mi22-mi Tabel 2-mi takuneqarsinnaapput. Inuiaqatigiit aningaasaqarnerinut sunniutissanik misissueqqissaarnermi KAIR Internationali pineqarmat Nuummi, Ilulissani Kangerlussuarmilu ingerlatsinermi angusassat misissueqqissaarnermi ilaatinneqarput. Allatut oqaatigalugu KAIR Internationalip suliaata, Kangerlussuuo inissisimanerata, siunissap periarfissallu akornanni ataqatigiimmat, misissueqqissaarnermi Kangerlussuaq pingaaruteqarpoq.

4.1.9 2024-p kingorna MIT-imut tapiissuteqarnissamik pisariaqartit

Nuummi Ilulissanilu mittarfiit 2024-p naanerani ammarniserisa kingunerisaanik Nuummi, Ilulissanilu mittarfiit piusut kiisalu imarpik qulaallugu timmisartuussinerit Kangerlussuup pingaarnertut mittarfiunera matusussaapput. Taamaalluni KAIR Internationalip akisussaaffigisaanik mittarfiit nutaat ammarniserisa kingunerisaanik, mittarfiit

sinneqartooruteqarfiusartut ilaat MIT-ip suliassaaniikkunnaarnerisa kingunerisaanik MIT-imut aningaasaliisoqarnissaanik pisariaqartitsisoqalissaaq. Tapiissuteqarnissamik pisariaqartitsineq missiliorsinnaaqullugu, ilanngaattissat ilanngaatigereerlugit MIT-ip Nuummi, Ilulissani Kangerlussuarmilu mittarfinnik ingerlatsinerani angusai aallaavigineqarput. Nuummi sinneqartoorutit 18 mio. koruunit missaanniipput, Ilulissani 8 mio. koruunit missaanniipput, Kangerlussuarmilu 45 mio. koruunit missaanniillutik. Mittarfiit sinneqartooruteqarfiusartut taakkua pingasut MIT-ip suliassaaniikkunnaarnerisa kingunerisaanik, ataatsimut isigigalugu ukiumut 71 mio. koruunit missaat tapiissutigineqartartussatut pisariaqartinneqassapput. Tapiissutissatut pisariaqartinneqartut aningaasat naleerukkiartornerinik siumut iluarsiissuteqarfiginerisigut, 2025-mi 76 mio. koruunit missaanniittut tapissutissatut pisariaqartinneqassasut naatsorsuutigaarput. Imapik qulaallugu timmisartuussisarnernut mittarfiit taakkua marluk ammarnerinit, imaappoq 2025-mit siumut, tapiissutissatut pisariaqartinneqartussat naatsorsorneqarput.

MIT-ip pigisaasa nalillit sinnerinut aningaasaleeqqinnissamik pisariaqartitat misissueqqissaarnermi ilaatinneqanngimmata tassunga tunngatillugu erseqqissassallugu pingaarneqarpoq.

4.1.10 Tunngavigisat ataatsimut isigalugit

Misissueqqissaarnermi tunngaviit aallaavigineqartut tulliuuttumi Tabel 2-mi, Tabel 3-mi kiisalu Tabel 4-mi takuneqarsinnaapput.

KAIR Internationalimi akiliisinnaassutsip ineriartornerani, KAIR Internationalip ingerlatsinissami, aningaasalersuinissamilu pilersaarutaa nutartigaq aallaavigineqarpoq. Nuup Ilulissallu akornanni akiliisinnaassutsip ineriartorneranut agguataarinermi tunngavigineqartoq, Tabel 2-mi takuneqarsinnaavoq.

Tabel 2: Tunngaviit ataatsimut isigalugit takussusiornera

	Nummi mittarfik	Ilulissani mittarfik	Aallerfik
Pingaarnertut tunngavigisat			
Naatsorsuineri ukioq aallartiffik		2021	
Ilusiliamut piffissaliussaq (Ukiut)		30	
Akit qaffakkiartornerat		1,75%	
Kingumootumik naatsorsuineri aallaavivik		4%	
Kingumootumik naatsorsuineri aalajangersimasooq		5,82%	
Mittarfiup atulerfissaa		01-01-2025	
KAIR Internationalimut akileeqaataassutsinik akiliutit			
Namminersortuik Oqartussat KAIR-imut akileeqaataassutsinik akiliutigeqqaagai (mittarfinnut pingasuusunut)		2.074 mio. kr.	
Nuup Ilulissallu akomanni agguataarinermi tunngavigineqartoq	35,8%		33,5%
KAIR Internationalimi akiliisinnaassutsip ineriartornera			
Nuup Ilulissallu akomanni agguataarinermi tunngavigineqartoq	54%		46%
MIT-imut tapiissutissatut pisariaqartinneqartut			
2024-p kingorna MIT-imut tapiissutissatut pisariaqartinneqartut (2021-mi akit naapertorlugit)		71 mio. kr.	Mittarfeqarfiit
Nuup Ilulissallu akomanni agguataarinermi tunngavigineqartoq	54%		46%
Angalanermi aningaasartuutit annikillinerat (2021-mi akit naapertorlugit)			
Imarpik qulaallugu angalanermi ataatsimi aningaasartuutit annikillinerat		1.053 kr.	Rambøll
Angalanermi akunnermik ataatsimik sivikillinerata nalinga		140 kr.	Rambøll
Imarpik qulaallugu angalanermi ataatsimi angalanerup sivikillinera agguaqatigiissillugu		Akunnerit pingasut	Rambøll
Angalanermi ataatsimi nerisassanun unnuisarfinnullu aningaasartuutit annikillinerat		2.107 kr.	Rambøll
Angalanermi nerisassanun unnuisarfinnullu aningaasartuutit annikillisaat		20%	Rambøll
Angalaneq inuiaqatigiinnut attuumassuteqartoq		50%	Deloitte
Nuup Ilulissallu akomanni agguataarinermi tunngavigineqartoq	66%		33% Rambøll
Pisariillisaaneq, allatigut angalaneq, ukioq 2025			
Pisariillisaaneq, allatigut angalaneq (ukiumut)		8 mio. kr.	Rambøll
Nuup Ilulissallu akomanni agguataarinermi tunngavigineqartoq	54%		46%

Nuummi, Ilulissani Kangerlussuarmilu mittarfinnut tunngatillugu MIT-ip akisussaaffigisaani 2021-mit 2024 tikillugu ingerlatsinermi angusassatut naatsorsuutigineqartut Tabel 3-mi takutinneqarput. Tamatuma saniatigut Nuummi mittarfiup ammarnissaata ukiumik ataatsimik kinguarnerata kingunerisaanik, Kangerlussuarmi mittarfiup piusinnaanerata sivitsorneqarneranut naatsorsuutigisamik aningaasartuutissat takuneqarsinnaapput.

Tabel 3: Mittarfinnut piusunut ingerlatsinermi inernerit aallaavigineqartut (2021-2024) mio. koruuninngorlugit.

Mittarfinni piusuni ingerlatsinermi inernerit (mio. koruuninngorlugit)	2021	2022	2023	2024	Kilde
Nuummi mittarfik	8,6	10,6	15,7	16,7	Mittarfeqarfiit
Ilulissani mittarfik	5,3	8,6	7,7	8,3	Mittarfeqarfiit
Kangerlussuarmi mittarfik	22,2	35,3	41,7	48,0	Mittarfeqarfiit
Kangerlussuarmi mittarfiup piusinnaanerata sivitsornera	-4,4	-8,6	-1,2	-1	Mittarfeqarfiit

Imarpik qulaallugu timmisartuussisarnernut Nuummi Ilulissanilu nutaanik mittarfiliornernut atatillugu, avataanit sulisoqarnermi ilanngaataqanngitsumik akileraarutitigut isertitassatut naatsorsuutigineqartut Tabel 4-mi takutinneqarput.

Tabel 4: Sanaartornermi ilanngaatitaqanngitsumik akileraarutitigut isertitassatut tunngavigineqartut (2021-2024) mio. koruuninngorlugit.


Ilanngaatitaqanngitsumik akileraarutitigut isertitat (mio. l	2021	2022	2023	2024	Kilde
Nuummi Ilulissanilu mittarfiliornemi ilanngaatitaqanngitsumik akileraarutitigut isertitat	22	44	44	22	Aningaasaqarnermut Nunamullu Namminermt Naalakkersuisoqarfik

5 Tunngaviit allanngornerinik inuiaqatigiit aningaasaqarnerinut sunniutissanik misissueqqissaarneq

Misissueqqissaarnermi immikkoortuni ataasiakkaani isertitat aningaasartuutillu immikkoortumi matumani saqqummiunneqarput. Immikkoortumi "Eqikkaaneq, inerniliinerlu"-mi allakkiatigut inerniliinermi, isertitat aningaasartuutillu taakkua tunngavigineqarput.

Nuummi Ilulissanilu mittarfinnut tunngatillugu ullutsinni nalinga ukiunut 30-nut naatsorsoraanni, inuiaqatigiit aningaasaqarnerinut pitsaasumik inerneqarluni, inerneru 700 mio. koruunit missaanniissasoq takuneqarsinnaavoq. Iluanaarutit aningaasartuutillu ullutsinni nalinga ukiunut 30-nut naatsorsorlugu agguataarneqarnera, Takussutissiaq 9-mi takuneqarsinnaavoq.

Takussutissiaq 9: Nuummi Ilulissanilu mittarfinnut tunngatillugu ullutsinni nalinga ukiunut 30-nut naatsorsorlugu (mio. koruuninngorlugu)



Mittarfinnut taakkununga marluusunut aningaasartuutissat annersaat KAIR-imut aningaasaleeqataassutsinik akiliutaapput. Malugalugu aningaasaleeqataassutsinik akiliutinut tunngatillugu naalagaaffiup piginneqataassusia iluarsiiffigineqarmat, imaappoq, nunatsinnit aningaasaleeqataassutsinik akiliutit inuiaqatigiit aningaasaqarnerinut sunniutissani misissueqqissaarnermi ukkatarineqarmata, Namminersorlutik Oqartussanit aningaasaleeqataassutsinik akiliutit ullutsinni nalingani ersersinneqarmata.

KAIR Internationalip akiliisnaassusiata ineriartornerani, danskit piginneqataassusiat aamma iluarsiiffigineqarpoq. Imaappoq, akiliisnaassutsip ineriartornerani 66,67 procentit misissueqqissaarnermi aallaavigineqarput. KAIR Internationalip akiliisnaassusiata ukiut 30-t ingerlanerini ineriartornera ullutsinni nalinganut naatsorsoraanni, pitsaasumik inerneqarluni 284 mio. koruuniuvoq.

Kangerlussuarmi mittarfik kiisalu Nuummi Ilulissanilu mittarfiit MIT-ip ullumikkut ingerlatarimmagit, KAIR-ip akisussaaffigisaanik Nuummi Ilulissanilu mittarfiit nutaat ammannerisa kingunerisaanik mittarfiit sinneqartooruteqarfiusartut ilaat MIT-ip suliassaasa ataaniikkunnaartussaammata, 2024-p kingorna MIT-imut tapiissuteqartoqartariaqartassasoq naatsorsuutigineqarpoq. Tamanna ukiunut 30-nut ullutsinni nalinganut naatsorsorlugu negativimik 1mia. koruuninik naleqqassasoq missiliorneqarpoq.


Siuliani eqqaaneqareersutut Nuummi Ilulissanilu mittarfittaassat ammarneqarnerisigut angalanermi aningaasartuutit annikillinerisigut, angalanerup sivikillineratigut kiisalu unnuisarfinnut nerisassanullu aningaasartuutit annikillinerisigut nunami angalasunut assigiinngitsutigit iluanaarutitaqartussaasoq naatsorsuutigineqarpoq. Tamanna angallasseriaatsimi piusumi pisariillisaasoqarnissaanik kiisalu ullumikkut angalasut amerlanersaat Nuummukarlutik, Ilulissiarlutilluunniit Kangerlussuakkoortarnerinik patsiseqarpoq. Taamaalilluni angalasut taakkua sivikinnerusumik angalasalerlutillu akunnittarunnaassapput. Angalasut Kangerlussuakkoortarunnaarlutik Nuummut Ilulissanulluunniit angalasalernissaasigut angalanermi aningaasartuutit annikillineri, misissueqqissaarnermi iluanaarutissat annersaraat.

Naatsumik oqaatigalugu misissueqqissaarnerup takutippaa, inuiaqatigiit aningaasaqarnerat isiginiassagaanni – sanaartornissamut ingerlatsinissamullu piffissaliusaaq nutaaq, tunngaviillu nutaat aamma aallaavigalugit Nuummi Ilulissanilu mittarfiit aningaasaliissutitsialaasut. Matumani KAIR-ip naalagaaffiup taarsigassarsinnaaneratigut, taarsigassarsianut aningaasartuutissanut apparsaaqataanera ilaatigut patsisaavoq. Tamatuma saniatigut mittarfiit ammanerisigut takornarialerinerup, nassiussanillu timmisartukkut nassiussisinnaanermut periarfissat pitsaanerulerisigut ineriartortitsinissamut sunniuteqaratarsinnaavoq.


Nuummut Ilulissanullu mittarfinnut immikkoortillugit inuiaqatigiit aningaasaqarnerini inernerit Takussutissiaq 10-mi aamma Takussutissiaq 11-mi takuneqarsinnaapput. Malugalugu immikkoortoq 4.1.2-mi allaatigineqartutut, Nuummi Ilulissanilu iluanaarutissat aningaasartuutissallu amerlanersaat agguataarinermi tunngavik malillugu agguataarneqarmata, agguataarineq eqqoqqissaartuungilaq.

Takussutissiani takuneqarsinnaavoq, inuiaqatigiit aningaasaqarnerini isumalluarnartumik angusat annersaat Nuummi mittarfimmeersut. Aallaqqaasiummi eqqaaneqareersutut, angallasseriaatsip piusup pisariillisarneqarnissaa Nuummi mittarfimmut tunngaviunera, Ilulissanili mittarfimmut tunngatillugu ilaatigut takornarialernikkut siunissami inuutissarsiuutinik ineriartortitsinissamut tapersersuinissaanik ilaatigut patsiseqarpoq. Takornarissat amerlinerisigut ineriartortitsinissamut sunniutaasinnaasut naatsorsoruminaallutik inuiaqatigiit aningaasaqarnerinut sunniutissanik misissueqqissaarnermi eqqaaneqareersutut ilaatinneqanngimmata, Ilulissani mittarfimmut tunngatillugu iluanaarutaasussat annertuneroratarsinnaapput. Tamatuma saniatigut erseqqissaatigineqassaaq, Nuuk Ilulissallu imminnut atammata, aalajangersimasumik aningaasartuutissat Ilulissallu avinneqanngippata, Nuummi aalajangersimasumik aningaasartuutit annerusinnaammata.

Takusutissiaq 10: Nuummi mittarfimmum tunngatillugu ullutsinni nalinga ukiunut 30-nut naatsorsorlugu (mio. koruuninngorlugit)



Takusutissiaq 11: Ilulissani mittarfimmum tunngatillugu ullutsinni nalinga ukiunut 30-nut naatsorsorlugu (mio. koruuninngorlugit)




6 Naatsorsuutigisamit allatut pisoqassagaluarpat kingunissai

Tunngavinnik allarpaalunnik misissueqqissaarnermi inernerit tunngaveqarput. Tunngaviit allat taakkua ilaat allannguuteqartillugit misissueqqissaarnermi inernernut qanoq sunniuteqarsinnaatiginersut immikkoortumi matumani ersarissarneqarpoq. Tunngaviit taakkua allat ataasiakkaarlugit allanngortieriarlugit, tunngaviit sinnerit allanngortinnagit allanngornerit taakkua inernernut qanoq annertutigisumik allannguititsinersut misissornerisigut ersarissarneqarput.

6.1.1 Najoqqutassami piffissaliussap allanngornerani

Ukiok 2021 aallarnerfigalugu ukiunut 30-nut piffissaliussaq misissueqqissaarnermi aallaavigineqarpoq. Nuummi Ilulissanilu mittarfiit 2025-mi ammassasut naatsorsuutigineqarpoq, ammaneriniillu iluanaarutissatut naatsorsuutigineqartut naatsorsuinermi aallaavigineqarlutik. Piffissaliussaq ukiunut 25-nut sivikillillugu inernernut qanoq annertutigisumik allannguitigissanersoq Takussutissiaq 12-imi takutinneqarpoq

Takussutissiaq 12: Misissueqqissaarnermi piffissaliussap allanngortinneqarneratigut, ullutsinni nalingata allanngornera



Piffissaliussaq sivikillineqarpat tamanna inernernut annertuumik sunniuteqassasoq takussutissiami takuneqarsinnaavoq. Piffissaliussaq ukiunut 25-nut sivikillisinneqarpat, assigisaanik ullutsinni nalinga 51 procentinik appartinneqarluni 392 mio. koruuninut appartinneqassaaq. Tamatuma saniatigut Ilulissanut tunngatillugu ullutsinni nalinga negativimut inississaaq. Naatsorsuutigisamit allatut pisoqassagaluarpat kingunissai pillugit misissueqqissaarnerup takutipaa, ukiunut 25-nut piffissaliussaqluni mittarfiit taakkua marluk ataatsimut isigigaanni, inuiaqatigiit aningaasaqarnerat isigalugu sulii aningaasaliilluarnerussasoq. Mittarfik ukiut 30-t sinnerlugit teknikkikkut piusinnaassasoq naatsorsuutigineqartarmat, tassunga tunngatillugu erseqqissassallugu pingaaruteqarpoq.


6.1.2 KAIR Internationalimi akiliisinnaassutsip ineriartornera

Mittarfiit atulernerisa kingorna KAIR Internationalimi akiliisinnaassutsip ineriartornera, 2033-mit 2034 tikillugu kiisalu 2043-mit 2044 tikillugu akiliisinnaassutsip appariarnissaa eqqaassanngikkaanni, ukiut amerlanersaanni akiliisinnaassusaata ineriartornera isumalluarnarpoq.

Akiliisinnaassuseq ineriartussappat, ingerlatatigut ineriartortitsisoqartariaqarpoq. Akiliisinnaassutsip ineriartornera ukiuni isumalluarfigisimasaanni 5 procentimik, 10 procentimillu appartikkaanni, tamanna ullutsinni nalinga qanoq sunnertissanersoq Takussutissiaq 13-imi takutinneqarpoq. Tamatuma saniatigut piffissami tassani akiliisinnaassutsip apparnissaanut KAIR Internationalip "katersinerata" saniatigut akiliisinnaassuseq isumalluarnartumik

ineriartungippat, tamanna inuiaqatigiit aningaasaqarnerini qanoq inernejassanersoq takussutissiami takutinneqarpoq.

Takussutissiaq 13: KAIR Internationalip akiliisinnaassusaata allangornerani, ullutsinni nalingani allannguutit (mio. koruuninngorlugit)




Akiliisinnaassutsip ineriartornera allangussappat ullutsinni nalunganut sunniuteqassasoq takussutissiami takuneqarsinnaavoq, tamannali misissueqqissaarnermi inerniliussamik allannguinissamut tunngavissinngilaq. Akiliisinnaassutsip piffissani marlussunni apparinissaannut "katersat" saniatigut akiliisinnaassuseq isumalluarnartumik ineriartungippat, ullutsinni nalinga 34 procentimik appartinneqarluni 464 mio. koruunit missaannut appartinneqassaaq.

6.1.3 Angalasut amerliartornerat

Misissueqqissaarnermi tunngavineqarluni angalasunut Rambøllip siulittuutigisaani naatsorsuutigineqarpoq, angalasut ukiumut 2 procentimik amerliartassasut. Taakkua 2 procentit saniatigut, mittarfiit ammarnerinit ukiut pingasut siulliit ukiumut 5 procentimik amerliartassasut naatsorsuutigineqarpoq. Angalasut 1 procent pointimik allangortillugit inernermit tamanna qanoq sunniuteqartigissanersoq Takussutissiaq 14-imi takutinneqarpoq.

Takussutissiaq 14: Angalasut ukiumut amerlisarnissaannik naatsorsuutip allangorneratigut, ullutsinni nalingata allangornera (mio. koruuninngiorlugit)



Mittarfiit nutaat ammarnerisigut iluanaarutissatut naatsorsuutigineqartunut angalasussanut siulittuut pingaaruteqarpoq. Takussutissiami takuneqarsinnaavoq, angalasussanut siulittuut allangortinneqarluni tamanna misissueqqissaarnermi inernernut sunniuteqartorujussuussasoq. Ukiumut ineriartorneq 1 procent pointinik annikilliguni, mittarfiillu ammarnerinit ukiut siulliit pingasut amerliartungippata, ullutsinni nalinga 94 procentimik annikillilluni 44 mio. koruuninut annikillissaaq. Ukiumut ineriartorneq 1 procent pointinik annikilligaanni kiisalu amerliartorpatu ullutsinni nalinga 63 procentimik apparluni 258 mio. koruuninut appassaaq.

Angalasut amerlassusaat allangorpata, tamanna misissueqqissaarnermut, imaappoq ullutsinnut nalinganut sunniuteqartorujussuussaaq

Ilutigalugu angalasut ukiumut amerleriarnissaattut aallaavigineqartoq qaffariassappat, ukiullu siullit pingasut 1 procent pointimik amerleriassappata, ullutsinni nalinga annertuumik isumalluarnartumiksunnerneqassaaq. Tassani ullutsinni nalinga 78 procentimik qaffalluni 1.249 mio. koruuninut qaffariassaaq.


6.1.4 Angallasseriaatsimi pisariillisaaneq

Mittarfittaat ammarnerinit angallasseriaatsip pisariinnerulerneratigut, angalanermit aningaasartuutit annikillinerisigut iluanaarutissat naatsorsuutigineqartut ilagaat. Tamatuma saniatigut Nuuliartut Ilulissiatullu Kangerlussuakkoortarunnaartussaammata, angalanera sivikillissussaavoq.

Angalasut Nuuliartut Ilulissiatulluunniit Imarpik qulaallugu angalanermit ataatsimi 2021-mi akigititat aallaavigalugit angalanermit aningaasartuutiminnik agguaqatigiissillugu 1.053 koruuninik sipaaruteqarsinnaasut misissueqqissaarnermit tunngavigineqarpoq. Tamatuma saniatigut angalasut agguaqatigiissillugu angalanertik akunnernik pingasunik sivikillissinnaassagaat naatsorsuutigineqarpoq, tassani angalanerup sivikillinerani akunneq ataaseq 140 koruuninik naleqartinneqarluni. Angallasseriaatsip pisariinnerulerneratigut, angalanerullu sivikinnerulerneratigut angalanermit aningaasartuutit annikillinissaannut tunngavigineqartut allangortillugit, inernerit qanoq sunnerneqarnerisut Takussutissiaq 15-imi takuneqarsinnaavoq.

Angalanerup sikinnerulernerana aningaasanngorlugu nalilerneqarsinnaanngimmat, taamaalillunilu aningaasanngortinneqarani piffissaq sipaarneqartup nalinga naatsorsuusiortifigineqarmat, sipaarutaasoq taanna misissueqqissaarnermut ilaatinneqannginnera, taamaalillunilu iluanaarutaasoq 100 procentimik annikillinera inuiaqatigiit aningaasaqarnerinut sunniutissaasa misissoqqissaarnerinut inernernut qanoq sunniuteqarnerisooq aamma misissorparput.

Takussutissiaq 15: Angallasseriaatsimik pisariillisaanerup, angalanerullu sivikillinerata nalingata allangornerisigut, ullutsinni nalingata allangornera (mio. koruuninngorlugu)



Naatsorsuutigisamit allatut pisoqassagaluarpas kingunissai pillugit misissueqqissaarnerup takutippaa, pingaartumik Nuummut Ilulissanullu angalasut eqqarsaatigalugit angallasseriaatsip pisariinnerulernerata nalinga allangussappat, ullutsinni nalinganut sunniuteqartorujussuussasoq. Angallasseriaatsip pisariinnerulerneratigut angalanermit aningaasartuutit nalingat 5 procentimik appartinneqarpat, ullutsinni nalinga assinganik appartinneqarluni 10 procentimik appartinneqassaaq, ullutsinnilu nalinga 631 mio. koruuninngorluni. Angalanermit aningaasartuutit nalingat qaffanneqarpat, ullutsinni nalinga assinganik 10 procentimik qaffalluni 769 mio. koruuninut qaffassaaq.

Angalanerup sivikinnerulernerata nalinga 5 procentimik appartinneqarpat, inuiaqatigiit aningaasaqarnerinut ullutsinni nalinga 4 procentimik appartinneqarluni 673 mio. koruuninut appartinneqassaaq. Killormut nalinga 5 procentimik qaffanneqarpat, assinganik ullutsinni nalinga 4 procentimik qaffalluni 728 mio. koruuninut qaffassaaq. Angalanermit piffissap atorpeqartup annikillinera misissueqqissaarnermut ilaatinneqanngivissoruni, ullutsinni nalinga

Nuuk Ilulissallu ukkataralugit inuiaqatigiit aningaasaqarnerinut sunniutissanik naliliinerup nutarternera

78 procentimik appartinneqarluni 152 mio. koruuninut appartinneqarpoq. Immikkoortissagaanni Ilulissani mittarfimmut ullutsinnut nalinga negativiusaaq.

7 Missingersuutini aningaasaqarnerup misissoqqissaarnera

KAIR Internationalimi ingerlatat malitsigisaannik nunatta karsianit isaasut aniasullu, missingersuutini aningaasaqarnerup misissoqqissaarnerani ukkatarineqarput. Nunap karsia isigalugu isumaqarpugut, ullutsinni nalinga il.il. allaavigalugit inuiaqatigiit aningaasaqarnerinut sunniutissanik naliliinerunani, nunatta karsianit isaasut aniasullu ukkataralugit misissueqqissaarinerusoq. Nuummut Ilulissanullu tunngatillugu nunatta karsia eqqarsaatigalugu ingerlatsinermi aningaasaqarneq ukiumit ukiumut oqimaaqatigiissanersoq misissussallugu, misissueqqissaarnerup siunertaraa.

Missingersuutini aningaasaqarneq pillugu misissueqqissaarnitsinni, KAIR Internationalip ingerlataani aningaasaatit ukkataragaat. Imaappoq, inuiaqatigiit aningaasaqarnerisa misissoqqissaarnerat assigalugu, Nuummi Ilulissanilu imarpik qulaallugu mittarfittaassaasat ukkataragaat.

Piffissat tulliuuttut naapertorlugit missingersuutini aningaasaqarneq misissoqqissaarneraqarpoq:

- 2021-p naanerani mittarfittaassaasat taakkua marluk 2024-mi atulernissaannut
- MIT-ip, KAIR Internationalip Nunatta Karsiatalu akornanni sunniivigeqatigiinneq ukkataralugu 2025-mit siumut ukiut 15-it

Nuummi Ilulissanilu mittarfittaassaliornermi sanaartornermi aningaasartuutit kiisalu ataavartumik aningaasaleeqqinnerit KAIR Internationalimit matussuserneqartassasut, missingersuutini aningaasaqarneq pillugu misissueqqissaarnermi naatsorsuutigineqarpoq.

7.1.1 2021-p naanerani atulernissaasa tungaannut


Mittarfittaassaasat sanaartorneqarnerini sanaartugassat suliarineqarnissaanni avataanit sulisussanik pisariaqartitsisoqassasoq, taamaalillunilu ilanngaatitaqanngitsumik inuiaqatigiinnut akileraartassasut naatsorsuutigineqarpoq. Nuummi Ilulissanilu mittarfinnut tunngatillugu ilanngaatitaqanngitsumik akileraarutitigut isertitassatut naatsorsuutigineqartut, misissueqqissaarnermi ilaatinneqarput.

Tamatuma saniatigut paasissutissat tulliuuttut aallaavigaagut:

- Nuummut, Ilulissanut Kangerlussuarmullu tunngatillugu ingerlatsinermi inernissatut MIT-ip missiliuutai
- Kangerlussuarmi suli ukiumik ataatsimik ingerlatsinissamut atatillugu piusinnaanerata sivitsoqarneranut aningaasartuutit

Iluanaarutit aningaasartuutillu agguataarnerat Takussutissiaq 16-imi kiisalu Tabel 5-imi takuneqarsinnaapput.

Takussutissiaq 16: Iluanaarutissatut, aningaasartuutissatullu naatsorsuutigineqartut, 2021-2024 (mio. korusunngorlugit)



Tabel 5: Iluanaarutissatut, aningaasartuutissatullu naatsorsuutigineqartut (mio. koruuninngorlugit)

	2021	2022	2023	2024
Ilanngaatitaqanngitsumik akileraarutitigut isertitat, Nuuk, Ilulissat	22	44	44	22
<i>Piffissami MIT: Nuummi, Ilulissani Kangerlussuarmilu mittarfii*</i>	36	54	65	73
Kangerlussuarmi mittarfiup piusinnaanerata sivitsorneqarnera	-4	-9	-1	-1
Iluanaarutit katillugit	58	98	109	95
Aningaasartuutit katillugit	-4	-9	-1	-1
Nikingassutaa	54	90	108	94

*Malugalugu, MIT-ip akisussaaffigisaanni Nuummi, Ilulissani Kangerlussuarmilu mittarfinnik ingerlatsinerimi sinneqartoorutaasartut, MIT-imi mittarfinnut amigartoorutaasartunut matussutissatut atorineqartarmata.

Piffissami tassani ilanngaatitaqanngitsumik akileraarutitigut isertitanit MIT-imiillu iluanaarutit kiisalu Kangerlussuarmi mittarfiup piusinnaanerata sivitsorneqarneranut aningaasartuutit tabelimi takutinneqarput. Erseqqissaatigineqassaaq, angallasseriaatsimi piusumi piffissami tassani angalanernut atatillugu nunatta karsianit aningaasartuutissatut naatsorsuutigineqartut tabelimi takussutissiamilu ersersinneqanngimmata. Immikkoortoq 7.1.2-mi takuneqarsinnaasutut imarpik qulaallugu timmisartuussisarnernut mittarfittaassat taakkua marluk ammarnernut atatillugu, angalasarnernut sivikillineratigut, angalanermi aningaasartuutit annikillinerisigut kiisalu unnuisarnernut nerisassanullu aningaasartuutit annikillinerisigut angallasseriaatsip pisariinnerulernera tunuliaqutaralugu, nunatta karsianut iluanaarutitaqassasoq naatsorsuutigineqarpoq.

7.1.2 2025-mit siumut ukiut 15-it

Nuummi Ilulissanilu mittarfittaassat atulereernerini nunatta karsiani isertitassat, aningaasartuutissallu ineriartornerat misissueqqissaarnermi uani takutinneqarput.

Imaappoq, silaannakkut angallassinerimi aqqissuussaarnermi nutaami KAIR Internationalip, MIT-ip, Nunatta Karsiatalu akornanni aningaasaqarnikkut sunniivigeqatigiinneq ukkatarineqarpoq.

Missingersuutini aningaasaqarnerup ineriartornerata misissoqqissaarnerani, mittarfittaassat atulernerinit siumut ukiut 15-t ingerlanneqarnerat misissorneqarpoq. Ukiut 15-it qaangiunnerini aningaasaatit qanoq ineriartuussanersut nalornissutigineqarmat, assersuutigalugu ukiut 30-t aallaavigineqanngillat. Misissueqqissaarnermi ingerlatsineq kisiat ukkatarineqarpoq. Taamak sivikitsigisumik piffissaliussaqaarnikkut, KAIR Internationalip taarsigassarsianik akilersuinissaanit missingersuutini aningaasaqarnerup misissoqqissaarnera annertuumik "sunnerneqarpoq". Piffissaliussaqaq siviserugaluarpas, misissueqqissaarneq amerliartortitsinerusumik inerneqassagaluarpas.

Tulliuttuni paasissutissat atorpagut:

- Inuiaqatigiit aningaasaqarnerinut sunniutissanik naliliineq 2018-imeersoq
- Kiffartuussinissami isumaqatigiissutinut pisariaqartitassasut MIT-ip missiliuussai
- KAIR Internationalip ingerlatsinissami, aningaasalersuinissamilu pilersaarutaa 2021-mi septembarimi nutarterneqartoq
- KAIR Internationalimut tunngatillugu taarsigassarsianut tunngasut nutartikkat

Naalagaaffik KAIR Internationalimik piginneqataapput. Piginnittuuneeq pillugu naalagaaffiup Namminersorlutik Oqartussallu akornanni isumaqatigiissut nalinginnaasumik aalajangersagaqarpoq ima paasineqarsinnaasunik, KAIR Internationali agguuassassaqaqarpat taakkua Namminersorlutik Oqartussat naalagaaffiullu akornanni avinneqassasut, takuuk

piginnittuunermut tunngasoq. Taanna patsisaalluni KAIR Internationalip aningaasaatit amerliartortitaasa 2/3-iinnai naatsorsuusiorfigineqarput.

Tassunga atatillugu KAIR Internationali piginnittunut aningaasaatinik amerliartortitsinissaa piginnittunit manna tikillugu siunertarineqanngimmat eqqaamassallugu pingaaruteqarpoq. Taamaattumik attaveqatigiinnermut aningaasaliissuteqaqqinnissaq siunertaralugu, KAIR Internationalip aningaasat amerliartortitai angallasseriaatsimut piginittut atugassanngortissagaat ilimanarsinnaavoq.

Tamatuma saniatigut misissueqqissaarnermut tulliuuttut ilaatingilagut:

- Konto pingaarnermut 72.26.02 Mittarfeqarfiit, ingerlatsinermit tapiissutit negativit (ukiumut -4,9 mio. koruunit)
- Kiisalu 87.73.22 Mittarfeqarfiit – mittarfiit, aqutigalugu aserfallatsaaliineq (ukiumut 10 mio. koruunit)

Mittarfiit nutaat atulerpata, ingerlatsineq aserfallatsaaliinerlu kiffartuussinissamik isumaqartigiissutitigoornissaat naatsorsuutigineqarmat, taakkua atorunnaassasut naatsorsuutigineqarpoq. Ataatsimut isigalugu illuatungeriit taakkua marluk nunatta karsianut ukiumut 5,1 mio. koruuninik pitsanngoriartitsissapput. Misissueqqissaarnermi matumani mittarfinnik ataatsimut ingerlatsineq pinnagu, Nuuk Ilulissallu kisiisa ukkatarigatsigit, misissueqqissaarnermi matumani taakku ilaatinneqanngillat.

Misissueqqissaarnerup takutippaa, atulernerinit ukiumi siullermi matussuserneqartariaqartunik amigaartooruteqarnissaq naatsoorsuutigineqartoq. Taassuma kingorna ukiut amerlanersaat sinneqartooruteqarfiussasut naatsorsuutigineqarpoq, tamannalu takussutissami allermi aningaasartuutit isertitallu akornanni isumalluarnartumik nikingassutaatigut, tamanna takuneqarsinnaalluni.

Unnuisarfinnut nerisassanullu aningaasartuutit annikillinerisigut, angalanermi aningaasartuutit annikillinerisigut, angalanerullu sivikillineratigut angallasseriaatsip pisariinnerulerneratigut iluanaarutit kingunerisaannik, isumalluarnartumik nikingassuteqalerpoq. Ilisimasagut naapertorlugit pisariillisaanernit taakkunannga iluanaarutissat suli sunniuteqanngillat. Taamaattumik pisariillisaataasinnaanikkut iluanaarutissat iluanaarutigissagaanni, annertuumik suliassaqaqqarmat misissueqqissaarnerup atuarnerni eqqaamassallugu pingaaruteqarpoq. Allatut oqaatigalugu; pisariillisaataasinnaasunit iluanaarutit taakkua iluanaarutigineqanngippata, isertitat aningaasartuutillu akornanni nikingassutaasoq negativioratarsinnaavoq.


KAIR Internationalimi akiliisinnaassutsip ineriartornera nunap pigisaanut iluarsineqarnikuuvoq, ukiumiillu ukiumut aningaasaatit assigiinngissusaasa misissorneqarnerisigut naatsorsorneqarluni. Mittarfiit naammassineqarnissaattut naatsorsuuteqarnermit, ukiunilu ingerlatsinermit angusat isumalluarnartuunissaannik missingersuusiorfiginerini, imaappoq 2026-mit siunissamilu (EBT) akiliisinnaassutsip ineriartornera naatsorsorneqarpoq. Ataavartumik aningaasaleeqqinnerit akiliisinnaassutsip ineriartorneranut ilanngullugit naatsorsorneqarput. KAIR Internationalip taarsigassarsianik akilersueriaasissaa patsisaalluni, akiliisinnaassutsip ineriartorneratigut ataavartumik "katersiffiqineqarluni", ukiut ilaanni aningaasaataat appariartussaapput. Taamaattumik missingersuutini aningaasaqarnerup misissoqqissaarnerani ukiumi taakkunani akiliisinnaassutsip ineriartornera nul-imiisneqarpoq. KAIR Internationalip akiliisinnaassusiata ineriartornerani, ukiumi pineqartumi ingerlatseqatigiiffimmi aningaasaatit isumalluarnartuunuuunissaannik naatsorsuuteqarnerisigut ersersinneqarpoq. Aningaasat aningaasaliissutigeqqinneqassanersut imaluunniit agguarneqassanersut – taamaassappallu qanoq amerlatigissanersut, aalajangiinerpaaluit apeqqutaassapput.

Mittarfiliassat pillugit suliniummut atatillugu ukiuni ataasiakkaani isertitat, aningaasartuutillu oqimaaqatigiilernissaannut aqquasaqqaagassat arlaqarput. Aqquasaagassat ilaat ilaatigut tassaapput:

- Aningaasanut Inatsisitigut atugassanngortitsinikkut angallasseriaatsimi pisariillisaanissat piviusunngortinneqarnissaat
- KAIR Internationalimut tunngatillugu iluanaarutinut politikki
- Atuisut akiliuteqarnerat
- Akileraarutinik qaffaaneq

2025-mit siunissami iluanaarutissat, aningaasartuutissallu ataasiakkaat tulliuuttumi takuneqarsinnaapput.

Takussutissiaq 17: Iluanaarutissat aningaasartuutissatullu naatsorsuutigineqartut (2021-mi akigitat malillugit mio. koruuninngorlugit)



Nassuiaat: Tungujortoq taartoq kiisalu titarnilersugaq tassaapput iluanaarutit, tungujortullu qaamasut tassaallutik aningaasartuutit. KAIR Internationalimi piginnittut iluarsiissuteqarfingereerlugit akiliisinnaassutsip ineriartornera ilanngukkaanni, ataatsimut isigigaanni ukiut affaasa missaat iluanaarutit aningaasartuutinit annertunerusartussaapput.


KAIR Internationalip akiliisinnaassutsikkut ineriartornera iluanaarutini ilanngullugu naatsorsorneqarluni, ukiuni ataasiakkaani iluanaarutit aningaasartuutillu nikingassutaat Takussutissiaq 18-imi takutinneqarpoq. Iluanaarutit takussutissami tungujortumik taartumik kiisalu qernertumik qaqortumillu titarnilersukkamik qalipaateqarput, kingullertullu taaneqartoq tassaalluni KAIR Internationali akiliisinnaassusaata ineriartornera. Akiliisinnaassutsip ineriartornerata qanoq annertutiginissaani agguassassanut, ingerlatseqatigiiffimmilu aningaasaliissutaaqqittussanut tunngatillugu qanoq aalajangiisoqarnissaa apeqqutaammat, taakkua titarnilersugaapput.

Mittarfittaassat ammarnersigut angallasseriaatsimi pisariillisaanerup kingunerisaanik angalanermi aningaasartuutit annikillinerisigut, angalanerup sivikillineratigut kiisalu nerisassanut unnuisarfinnullu aningaasartuutit annikillinerisigut iluanaarutissatut naatsorsuutigineqartut, tungujortumik taartumik qalipaateqarput. Iluanaarutit taakkua 2018-imi misissueqqissaarnermi Alloriarneq 2-mit tunngaveqarput, 2021-milu akigititanut siumut iluarsineqarlutik. Piffissatigut iluanaarutissat ukiut sisamat ingerlaneri atuutsikkiartuaarneqassasut ilimagineqarpoq, taamaalillunilu ukiumit siullermit tamakkiisumik sunniutissaqaratik. Eqqaaneqareersutut, iluanaarutissat iluaqutigissagaanni pisariaqartunik suliniuteqartoqartariaqarpoq.

Ukiumit ukiumut aningaasartuutissat tungujortumik qaamasumik qalipaateqarput. Nuummi, Ilulissani Kangerlussuarmilu mittarfiit suliassaaniittussaajunnaartussaanerisa kingunerisaanik nutsernermi aningaasartuutit, MIT-imullu tapiissuteqarnissamik pisariaqartitat tassaniipput. Nutsernermi aningaasartuutissanut immikkoortitsisoqarsimanersoq politikikkut suli nalunaarutigineqanngilaq, naatsorsuutigisamilli aningaasartuutissatut misissueqqissaarnermi ilannguppagut.

Iluanaarutit aningaasartuutillu nikingassutaat Takussutissiaq 17-imi takutinneqartut, Takussutissiaq 18-mi takutinneqarput. Ukiut ilaanni isumalluarnangitsumik, ukiullu ilaanni isumalluarnartumik angusaqartoqassasoq, taamaakkaluartorli amerliartortitsinermi nikinganera 2040-mi isumalluarnartoq takussutissiaq takutipaa. Taarsigassarsiat amerlanersaat 2039-mi akilereersimanissaat nunatta karsiani tamakkiisumik isumalluarnartumik angusaqarnissamut patsisaaqataapput, tamatumani amerliartortitsinermi angusamut isumalluarnartunngortitsilluni 2040-mi inernissaa annertuumik isumalluarnarluni.

Takussutissiaq 18: Iluanaarutit aningaasartuutillu akornanni naatsorsuutigisamik nikingassutissat (2021-mi akigitat malillugit mio. koruuninngorlugit)



Nassuiaat: Ukiut ukiumut iluanaarutit aningaasartuutillu assigiinngissusaat ukiumut nikingassutaata takutipaa, amerliartortitallu nikingassutaata amerliartortitat piffissap ingerlanerani assigiinngissusaat takutillugu.

Takussutissiaq 17-imi iluanaarutit aningaasartuutitullu allassimasut ataasiakkaat, Tabel 6-ip aamma Tabel 7-ip takutipaat.

Tabel 6: Aningaasaatit ineriartornerat ilanngullugu naatsorsuutigisamik iluanaarutissat (2021-mi akigitat naapertorlugit mio. koruuninngorlugit)

Iluaaarutit	2025	2026	2027	2028	2029	2030	2031	2032
KAIR Internationalimi akiliisinaassutsip ineriartomerata 2/3-ia	0	39	28	31	35	6	8	10
Angallasseriaatsimi pisariillisaanerit, Nuuk aamma Ilulissat	47	49	52	55	55	55	55	55
<i>Taakkunannga angalanermi aningaasartuutit ikilinerat</i>	28	28	28	28	28	28	28	28
<i>Taakkunannga angalanerup sivikillinera</i>	9	11	15	18	18	18	18	18
<i>Taakkunannga unnuisarfimmut nerisassanullu aningaasartuutit annikillinerat</i>	7	7	7	7	7	7	7	7
<i>Taakkunannga allatigut angallassinermi aningaasartuutit annikillinerat</i>	2	2	2	2	2	2	2	2
Iluaaarutit katillugit	47	88	80	86	90	61	63	65

Iluaaarutit	2033	2034	2035	2036	2037	2038	2039	2040
KAIR Internationalimi akiliisinaassutsip ineriartomerata 2/3-ia	13	0	20	23	28	30	10	59
Angallasseriaatsimi pisariillisaanerit, Nuuk aamma Ilulissat	55	55	55	55	55	55	55	55
<i>Taakkunannga angalanermi aningaasartuutit ikilinerat</i>	28	28	28	28	28	28	28	28
<i>Taakkunannga angalanerup sivikillinera</i>	18	18	18	18	18	18	18	18
<i>Taakkunannga unnuisarfimmut nerisassanullu aningaasartuutit annikillinerat</i>	7	7	7	7	7	7	7	7
<i>Taakkunannga allatigut angallassinermi aningaasartuutit annikillinerat</i>	2	2	2	2	2	2	2	2
Iluaaarutit katillugit	68	55	75	78	83	86	65	114

Tabel 7: Naatsorsuutigisamik aningaasartuutissat (2021-mi akigitat naapertorlugit mio. koruuninngorlugit)

Aningaasartuutit	2025	2026	2027	2028	2029	2030	2031	2032
Nuummi, Ilulissani Kangerlussuarmilu mittarfiit MIT-ip suliasaanniikkunnaarnerisigut tapiissutit	71	71	71	71	71	71	71	71
Nutsernermi aningaasartuutit	8	13	11	0	0	0	0	0
Udgifter i alt	79	84	82	71	71	71	71	71

Aningaasartuutit	2033	2034	2035	2036	2037	2038	2039	2040
Nuummi, Ilulissani Kangerlussuarmilu mittarfiit MIT-ip suliasaanniikkunnaarnerisigut tapiissutit	71	71	71	71	71	71	71	71
Nutsernermi aningaasartuutit	0	0	0	0	0	0	0	0
Aningaasartuutit katillugit	71	71	71	71	71	71	71	71



Deloitte is a leading global provider of audit and assurance, consulting, financial advisory, risk advisory, tax and related services. Our global network of member firms and related entities in more than 150 countries and territories (collectively, the "Deloitte organization") serves four out of five Fortune Global 500® companies. Learn how Deloitte's approximately 330,000 people make an impact that matters at www.deloitte.com.

Deloitte refers to one or more of Deloitte Touche Tohmatsu Limited ("DTTL"), its global network of member firms, and their related entities (collectively, the "Deloitte organization"). DTTL (also referred to as "Deloitte Global") and each of its member firms and related entities are legally separate and independent entities, which cannot obligate or bind each other in respect of third parties. DTTL and each DTTL member firm and related entity is liable only for its own acts and omissions, and not those of each other. DTTL does not provide services to clients. Please see www.deloitte.com/about to learn more.

© 2021 Deloitte Statsautoriseret Revisionspartnerselskab. For more information, contact Deloitte Global